

四庫全書

集部

欽定四庫全書

集部

忠肅集卷三

詳校官編修臣翟 槐

中書臣劉源溥覆勘

總校官檢討臣何思鈞

校對官學正臣翁樹棠

謄錄監生臣王 宮

欽定四庫全書

忠肅集卷三

明于謙撰

南征類

兵部為懷柔遠人事吏科抄出吏部左侍郎何文淵題
臣訪得貴州地方洪武年間止設貴州思南思州宣慰
司管屬土民仍設都司衙門鎮守其地太祖高皇帝命
鎮遠侯顧成在彼鎮守事簡民安遠人畏服永樂十一
年湖廣布政司叅政蔣廷贊具奏於貴州開設布按二

司將思南等三宣慰司地方改設六府每府所管不過三四長官司人民每司不過一二百戶官多民少點差弓兵皂隸門子庫子驛夫等項應答不前官吏在彼廉潔者少貪墨者多又從取索民財土民受逼日漸困窮以致去歲苗賊反叛殺害軍民總兵官官聚又生事激變水西等處土官共起謀逆劫殺地方燒毀衙門驅虜人口官軍征討屢嘗交鋒殺人盈野自去春以來米糧艱難人多餓死傷天地之和名水旱之災未必不由於

斯今兵疲民困又遣將南征師旅之行糧餉為先湖廣四川雲南三布政司僭運供給勞苦萬端恐生他變貴州地方山嶺高峻林木深奧雖有雄兵猛將急難成功且又土人之性叛服不常如蒙乞勅兵部會多官計議其被賊燒毀衙門弗復起蓋布按二司并各府大小官吏及從征官軍俱各取回地方止照洪武年間設立宣慰司衙門管屬土人設都司衙門都指揮等官以鈴束軍衛遣大將一員前去鎮守仍降勅書出給賞賜命大

臣一員便於言語者前去招撫便宜行事宣布恩威賞勞土官土人候西北邊鄙寧息另行計議復設衙門於今多事之秋且置此小寇於度外等因具題本官奏奉聖旨該衙門看欽此欽遵抄出到部查得先因貴州等處苗賊生發攻圍畢節平越等衛城池敵殺官軍剽掠人畜已經節次具題欽命總督總兵等官王驥等領兵勦殺去後續該巡按貴州監察御史黃鎬題稱彼處賊勢猖獗城池圍困及稱王驥老病等因本部又經具題

欽命保定伯梁珪充總兵官替王驥領兵殺賊及差官
量調直隸九江等衛官軍前去協助殺賊去後今侍郎
何文淵奏要將貴州地方被賊燒毀衙門弗復起蓋布
按二司并各府大小官吏及從征官軍俱各取回止設
宣慰司及都司衛所一節臣等切詳貴州地方雖僻在
一隅人多頑獷係我太祖高皇帝開創於前太宗文皇
帝經營於後迄今八十餘年法制已定地方無虞比年
以來為因邊將處置乖方加以征南之師數出兵疲於

久戍民困於遠輸遂致各種賊寇乘機生發殺掠人畜
上干聖慮勞師遠征已及一年之上各該城池雖被蠻
賊圍困而各城官負皆能効力死守及總督總兵叅將
巡按三司等官又不曾要將貴州地方遺棄并征進官
軍取回緣由具奏况土地祖宗之土地人民祖宗之人
民豈可輕易棄擲兼且事干邊務難以遙制合無行令
總督軍務本部左侍郎侯璉總兵官保定伯梁瑄等將
本官所言取回各衙門官負等項緣由公同勘議明白

務在斟酌停當處置合宜上不違祖宗之成法下不貽
邊境之後患通行具實回奏定奪其言要出給賞賜命
大臣一員前去招撫一節緣此賊勢已猖獗惡已稔盈
四出紛擾種類不一倚山箐而為險效蜂蟻而屯聚既
無所指定處又無常管頭目非得深曉夷情熟知道路
之人卒難招撫訪得何文淵先已出差貴州備諳本處
山川險易夷情向背合無將本官量與陞職請勅并關
領賞賜前去貴州與同侯璉等相度賊勢便宜招撫惟

復不必差官只差人馳驛齎文與侯璉公同總兵官保定伯梁瑄等審度前項賊情量宜撫捕務在日下寧帖其合用賞賜銀布等件就彼官庫量為支給不必京師運去務俾撫捕兩得其宜地方不致失陷緣奉欽依該衙門看事理具題景泰元年四月十九日奉聖旨是不必差官只行文書與侯璉梁瑄整理欽此

兵部為緊急邊務事兵科抄出鎮守廣西總兵官征蠻將軍都督僉事田真等題准右軍都督府勘合准兵部

咨呈該總兵官田真等奏抄出本部議擬請勅令左僉都御史等官楊信民等看議如果廣東賊徒生發官軍守備不敷即於屬衛所府州縣揀選舍餘民壯及設法招募土兵協同現在官軍相機守備殺賊不許指以人少馬無因而失誤地方等因備咨前來照得近該叅將都指揮使武毅手本開稱見統軍士并會合廣東江西等處官軍至南海縣金利巡檢司見得賊船不下千百餘隻不次前來迎敵嚴督軍兵連日對敵殺退賊衆遁

於石門等處等因臣會同廣西巡撫刑部右侍郎李棠
巡按監察御史胡新都布按三司右布政使等官章聰
等議得廣西地方即目慶遠來賓融縣等衛所城池俱
被賊人圍困東泉洛容攬灘大汾等處賊寇不計萬數
四散屯聚攻劫各縣柳州一帶水陸道路俱各不通殺
虜洛容永福等縣鄉村男婦不計其數遠近軍民肝膽
塗地賊人又行聚衆要劫永福縣治及蘇橋等處逼近
廣西城池甚至向化夷人俱被賊人煽惑及逼脇競起

為惡事勢十分危迫節差百戶程源劉成等具題去後
今廣東賊徒既已殺退比與廣西賊勢稍緩又有南京
江西等處官軍足勾追捕合照兵部奏准相度兩處賊
情緩急互相為援事理將廣西官軍取回策應欲候奏
請不無遲誤除差官馳驛將叅將武毅原領去官軍土
兵星夜取回救援及行廣東都司轉行鎮守左副總兵
都督同知董興左僉都御史楊信民等嚴督南京江西
等處調到官軍追捕餘賊外緣係取回策應廣東官軍

事理具題該本部官欽奉聖旨兵部看欽此又該總兵官田真題為賊情事照得廣西所屬府州縣徭獍夷人遞年作耗前總兵官右都督等官山雲等鎮守之時俱有調湖廣貴州廣東各都司官軍前來協同廣西官軍哨守尚且不敷賊人窺伺出沒不意正統十年冬為因兩廣賊寇生發將廣東都司調來征進廣西官軍俱各取回策應又欽奉勅書選調廣西精壯官軍土兵一萬員名前去廣東會同勦賊為是撤去守備廣西賊寇處

處蜂起不能固守節經具題外續因柳州等處賊勢猖獗已經差官馳驛前去屬衛調遣署都指揮使范信署指揮使鄧欵各領官軍前到柳州會合都指揮同知孫麒官軍併力勦殺賊徒於景泰元年二月二十五日行至北流縣遇賊攻打縣治督軍殺獲首級二十八顆三月初四日行至來賓縣被賊前後攻打來賓千戶所城池有范信連日督軍對敵被賊藥箭射傷下唇穿出右腮賊人退遁烏石堡等處緣范信鄧欵二哨官軍止有

一千四百負名其賊徒却有七千衆寡不敵雖經不次
催調路阻未能會合近該富川縣徭賊盤性子等自稱
彌勒佛主令其賊衆造為妖言扇惑地方夷民無知一
時響應旬日之間聚至千餘為照土兵合謀不可稍緩
又摘指揮葛宗蔭管領官軍一千員名星夜前去乘其
未定以擊之今照慶遠柳州融縣來賓洛容等處賊人
不計萬數攻打城池堡分殺虜鄉村逼近廣西城池除
調指揮馬宣量領官軍於都狼山等處及都指揮曹福

領軍於蘭麻等處指揮賈祥領軍於永福等處險隘去處據守防其衝突庶可等待應援緣賊徒衆多非得大勢以折之適足以長其侮慢邊備之心不可輕動除另行會本具題取回征進廣東官軍救援外緣係備邊事理具題該本部官欽奉聖旨兵部看了來說欽此欽遵通抄到部查得先該鎮守廣西總兵官田真等節題彼處蠻賊生發攻打縣治殺死官軍要將叅將武毅領軍回還非惟不能以救廣東之危尤恐一時亦未能到廣

西應援不無彼此妨悞兩無成功節次奏准行令廣東鎮守總兵等官都督同知董興等會同武毅調度各起官軍土兵人等務將前賊作急勦滅就令武毅領軍回還操守去後今照田真奏稱廣西賊勢十分危迫已行差官將武毅原領官軍土兵取回一節臣等切惟救患睦鄰乃將臣之當務專權方命在國法所難容今照田真當叅將武毅已到廣東徃徃具奏本處賊寇滋蔓既不能調度見有官軍人等隨宜撫捕又不候奏請定奪

輒將武毅官軍取回似此方命專權姦詐欺罔法所難容况即目四方多故敵騎縱橫調軍策應乃是邊境常事若是將帥互相放倣各將自己官軍取回豈特違朝廷命令必致壞軍國重務况兼廣東總兵等官都督同知董興等屢奏彼處賊首黃蕭養等聚眾僭號勢甚猖獗而廣東軍民顛望武毅之來應援甚於饑渴之欲飲食今田真與武毅互相串同逗遛不進輒自取回以致徒勞士馬虛費糧儲兩處地方俱不得濟所據田真合

當拏送法司究問以為將臣專權欺罔之戒緣即目邊
方多故緊要用人合無請勅切責田真令其查勘武毅
所領官軍若在廣東未回仍令就彼作急勦殺賊寇黃
蕭養等盡絕仍回廣西守備若是已到廣西將領回官
軍數內一半存留本處守備一半或令武毅或令委勇
敢都指揮一員統領前去廣東殺賊務在兩處地方俱
無失所仍令田真等用心奮勇勦殺本處賊寇以贖專
擅欺罔之罪如是失機誤事治以重罪不恕本部仍行

廣東廣西巡撫鎮守官負并巡按御史都布按三司一體協力各將本處賊寇勦殺盡絕以除軍民之患毋得互相推倚玩寇殃民自取重罪不便緣條請勅及奉欽依兵部看并兵部看了來說事理具題景泰元年四月二十九日奉聖旨是欽此

兵部為苗賊聚眾劫殺等事兵科抄出湖廣按察司分巡湖南道僉事程志學題景泰元年十月二十九日據長沙府寧鄉縣申准安化縣儒學牒呈准本學教諭鍾

旻闕稱本年十月二十一日早忽有苗賊生發結構人
衆前來安化縣地方劫虜人財殺人放火有本縣知縣
馬思敬帶領隘衙人等先自般移不知去向十一月初
四日又據本府湘鄉縣申景泰元年十一月初二日辰
時分忽有苗賊數多各執鎗弩器械鳴鑼擊鼓張打旗
號來縣劫掠吶喊數聲驚散人民為因火夫人等對敵
不過俱各奔走殺傷人命虜去人馬燒毀房屋等因到
道臣照得先據寶慶衛經歷司申稱苗賊聲言要來湘

鄉縣流劫當委長沙衛府指揮僉事胡勝正千戶周僖
推官李鐸帶領軍餘火夫三百餘名前去湘鄉等縣議
集本境民夫隄備撫捕去後今各申前來除添撥軍餘
民壯設法追捕外緣係賊情具題該通政使司官奏奉
聖旨兵部知道欽此又該湖廣長沙府通判顧元等亦
題前事通抄到部查得先該湖廣都司等衙門都指揮
使等官馬翔等題稱湖廣寶慶府武岡邵陽等州縣地
方俱有苗賊殺掠人畜燒毀衙門房屋等因本部抄出

已經議擬奏行總督湖廣貴州軍務右都御史王來總
兵官保定伯梁瑄并湖廣都布按三司捕盜官員及巡
按監察御史各要整搦官軍民壯人等互相尅期設法
將前賊截殺如果賊情十分緊急及別有處置星馳奏
報去後今奏前因叅照前項苗賊先已到於寶慶府所
屬州縣搶掠因無官軍隄備截殺以致益肆猖獗蔓延
到於長沙府地方殺人放火全無畏懼及照長沙實控
大江上流相去武昌不遠今已被賊侵擾則是湖廣腹

裏地方亦被其害顯是彼處司府州縣官員平居素無武備遇警望風奔走坐視民患略不介意若不早為嚴督處置誠恐賊勢益張民愈受害合無本部差人馳驛齎文與王來梁瑤并續差去都御史李實督同都布按三司捕盜官員及巡按監察御史設法調度官軍人等務將前賊及早撲捕盡絕勿使滋蔓張大如若似前延緩縱賊殘害人民罪有所歸仍將剿捕過賊寇緣由作急馳奏緣奉欽依兵部知道事理具題景泰元年十二

月初三日奉聖旨是欽此

兵部為捷音事兵科抄出右副總兵右都督方英等題
景泰元年四月二十七日該總督軍務兵部尚書侯璉
調臣統領都指揮同知劉玉等官軍直擣賊首郎賞改
寨攻勦叛寇官兵剋破賊巢百戶金亮等擒獲偽王王
阿同郎賞改斬首二十六級當日尚書侯璉又調右副
總兵田禮統領署都指揮僉事李鑑指揮僉事高勳等
官軍掩襲銅鼓等寨攻開賊巢生擒賊人阿王斬首二

十四級二十八日復調右叅將都指揮使李友統領都
指揮同知丘真都指揮僉事陳禎等官軍達官人等由
清平徑趨都勻衛解圍進至狗場遇賊藏伏截路當督
都指揮僉事陳禎指揮僉事楊海等官軍達官人等奮
勇向前與賊對敵殺敗賊衆就彼駐兵五月初一日至
都勻解圍初六日右叅將都指揮使李友統領都指揮
丘真陳禎等官軍達官士兵攻勦都勻緊管琵琶等寨
反叛蠻賊攻破賊寨斬首一十七級生擒五人餘賊奔

遁山箐初八日仍領官軍土兵搜山勦捕斬首一十七級生擒三十一人十一日右將軍李友統領都指揮丘真陳禎等官軍達官人等用彼所鎮撫陳良等作鄉道就彼開通舊路透出龍里地界兵進邦木擺忙等處箐口遇賊先據高山各執器械奔衝而下官兵奮勇併力夾攻斬首一十五級餘賊潰散十四日兵次葛里鋪遇賊率衆邀截我師當督官軍交鋒力敵殺敗賊衆斬首數級生擒一人十五日回軍龍里臣同右叅將李友統

領官軍達官人等進勦大小平伐上馬轎白納等長官
司不服招撫者擺省等寨蠻賊十八日臣領都指揮鄭
儁等分勦革亞等寨克破賊巢殺敗賊衆斬首三十八
級生擒首從賊徒七名餘賊奔遁掠其委積焚其巢穴
右叅將李友統領都指揮丘真陳禎等分勦把路擺多
等寨殺敗蠻賊斬首二十五級生擒賊人四名餘賊遠
遁獲到人口牛馬就給有功官軍二十日臣又同叅將
李友復統官兵分勦擺省等寨殺敗賊衆斬首二十一

級生擒二人二十四日尚書侯璉調都指揮劉玉脫孫
貴州宣慰使司宣慰使宋昂等官軍達官土兵人等攻
勦貴州所屬狗場等寨叛賊見官軍一到棄寨奔走乘
勢追逐斬首十餘級六月初四日據守備平越衛都指
揮張任呈報羊腸河等處先次殺敗蠻賊不服招撫復
糾醜類截殺官軍臣同右副總兵田禮統領都指揮僉
事高遠鄭儁陳禎孫諒等官軍兼程復回平越相機勦
捕尚書侯璉督調右叅將李友率領都指揮劉玉丘真

尹瑢張貴等官軍達官人等前進普定一帶地方分兵
會勦十二營長官司蒙登上下公具七伯房等寨為惡
蠻賊就令安撫蕭節作鄉道差官齎執旗牌督兵哨至
蒙登等寨賊先聚眾據險迎敵我軍分哨齊力並進登
高逆衝賊寨殺敗眾賊棄寨奔走官兵乘勝追逐斬首
二十級生擒八人餘賊奔遁山箐十一日進勦七伯房
上下公具等寨賊窺官兵進勦先移家小過江止留精
壯各執鎗弩挨牌拒敵官兵奮勇並進左右力擊攻開

排柵殺敗賊衆賊既披靡且奔且拒官軍分列追至七
伯房江邊通斬首一百七十二級生擒一十三名餘賊
墜江落水死者不計其數復令官軍抄其積聚米穀牛
馬大小賊寨二十餘處縱火齊燒營寨悉為煨燼招撫
逃竄遣回復業本月二十日尚書侯璉復調指揮劉端
郭貴等官軍土兵人等進勦十二營長官司管下不服
招撫白石崖等處蠻賊先埋排柵聚衆據守石關官軍
奮勇攻破關口殺敗賊衆追至河邊斬首數級餘賊搶

船過河淹死不知其數本月二十八日右叅將李友統領都指揮劉玉丘真尹瑢脫孫等官軍達官人等進勦寧容寨長官司不服撫化七寨九十九等寨官兵進至牛蹄關遇賊聚衆各執器械把關督兵攻開關口殺敗賊衆斬首數級七月初一日兵進賊首阿信寨前深潭闌遶天生石橋止過一人馬騎難行賊立排柵七層用板遮護後山高聳當督官軍攻莫能開分兵二哨左右與賊對敵右哨伐木取路擊截其中賊不能支首尾自

亂官軍併力克破排柵直擣山巔賊居巢穴通斬賊首
四十四級盡獲牛馬米穀火其巢穴其餘未勦寨分蠻
賊一見破此險惡硬寨畏威投戈赴營告降七月初二
日臣與同右副總兵田禮統領都指揮高遠鄭儻等官
軍達官到於平越羊腸河哨把緝知為惡蠻賊遁往翁
平等寨當督官軍直抵各寨蠻賊恃險拒敵官軍齊力
併進賊見我師奮勇懾駭敗走督軍追殺斬首一十六
級投崖死者不知其數初十日委都指揮僉事陳禎等

統領官軍護送糧米前往都勻接濟有賊首楊阿別等復聚為惡就領官軍於十二日徑趨本寨蠻賊約有三百餘人各執鏢弩拒敵當督官軍達官土兵人等奮勇殺敗賊衆斬獲首級一十四顆生擒一名餘賊潰散本月十三日尚書侯璉調右叅將李友統領指揮丘真等官軍達官土兵人等分路進勦西堡長官司管下不服撫化阿姜等寨十四日官軍進彼看得山勢連環林巖險惡賊立三寨首督官軍克破二寨斬首數級賊投入

高山硬寨猶以死敵遂督牌手盤山取路衝冒矢石奪
取高峰會合都指揮劉玉等官軍四面夾攻克賊寨
噍類無遺十六日侯璉復調指揮王政等領兵攻克安
莊逸東白石崖等寨通斬首一百八十九級剽其牛馬
等畜焚其賊巢掣兵回還二十日分調右叅將李友統
領都指揮丘真尹瑢等官軍達官前進畢節開通路道
八月初四日臣與右副總兵田禮統領官軍達官人等
前往羊腸河哨捕蠻賊約有三百餘人在於楊老堡吹

角吶喊拒敵官軍與戰對敵斬首數級餘賊敗遁收軍
回還本月初八日賊首沈九又在谷蒙等處惑衆為惡
臣同右副總兵田禮督調指揮趙信并達官軍人等由
羊腸進兵分為二哨徑擣本寨遇賊約有三百餘人倚
山崎嶇設伏隘口截路當督官軍整擗齊備與賊迎敵
奮勇殺敗賊衆斬獲首賊申俊等六十七級生擒一名
餘賊奔遁就彼劄營搜捕初十日收軍復回平越十六
日准尚書侯璉手本開稱本職回至普定得患傷寒等

病見在官軍無人統領勦殺疾早前來調度臣於十二日帶領輕騎兼程到於普定侯璉先已病故當督見在官軍撫勦餘賊及差諳曉夷情之人撫出為惡四十餘寨及母總管奢牙等諭令回寨復業其有得法等寨累招不服本月二十日調領都指揮劉玉等官軍達官土兵人等直抵賊寨蠻賊拒敵當督官軍追殺斬首數級生擒二名餘賊奔走過江渰死數多獲其人畜火其巢寨收軍回還普定等處賊情稍寧節該巡撫巡按等官

王恂黃鎬等節報貴州垂西等處苗賊聚衆剽營扇惑
為惡宜乘早進兵撲捕等因臣於本月二十七日統領
都指揮劉玉脫孫等官軍人等復回貴州會同各官計
議十月初六日親領都指揮劉玉李鑑脫孫陳禎宣慰
宋昂等官軍達官土兵追勦初七日至小垂西兵分四
哨攻打昆阻從等三寨各賊據險作亂埋立排柵拒敵
我師臣督官軍身先士卒攻破賊寨斬首數級生擒四
名各寨蠻賊投崖死者甚多火其巢寨剽其米穀牛馬

人口給賞有功官軍就彼安營初八日差宣慰宋昂撫
出開合等六十二寨寨長李保等赴營告降諭回復業
守路十六日移兵革馬等寨搜捕次日革馬罵等出營
歸歛亦令服業其各項加等寨生勅督兵進勦倚恃山
高陟峻林木深密樹立排柵二層拒守迎敵官軍人等
伐木取路不避矢石奮勇力戰攻破排柵蠻賊中傷敗
走投箐當督官軍追殺斬首數級餘賊奔遁墜巖死者
不知其數火其巢穴收軍復回貴州十八日右副總兵

田禮統領都指揮鄭儁孫諒等官軍達官人等進勦大
小平伐等處復聚為惡蠻賊官軍至彼賊人預先將家
小搬移遠遁止是精壯披甲執弩迎敵當領官軍人等
殺敗斬獲首賊把肘亞等首級餘賊潰散本月二十二
日准右叅將都指揮使李友手本於八月十七日兵到
畢節九月十三日統領都指揮丘真尹瑢等官軍達官
起程進至赤水哨至母狗洞菁木稀鋪下營差人哨看
到馬砍隘口賊人伐木逐節闌路兩傍林內苗賊藏伏

十四日整搦精兵調都指揮同知丘真等為前鋒將闌路樹木般伐取路並進有苗賊三百餘人占據山巔弩石如雨當督官軍分為兩哨攀援林木蟻附上山併力夾攻奮勇殺賊斬首四十五級餘賊潰散哨至層臺箐口賊兵約有一千餘徒各持挨牌鎗弩迎敵我師當令指揮劉潤等為左哨田凱為右哨都指揮丘真等為中哨官軍達官人等衝入賊陣銃鉋火器舉發苗賊敗走斬首七十八級生擒二名追至層臺站邊又有苗賊二

百餘衆迎敵官軍勇戰斬首四十六級生擒二名餘賊
奔遁焚其賊巢兵進層臺前所左邊山上下營前後蠻
賊約有三千餘人設伏迎敵官軍奮勇殺敗斬首三百
二十八級生擒七名十六日官兵進至白崖賊兵約有
三百餘徒於草內突出後哨都指揮尹瑤官軍達官奮
勇追殺斬首二十四級餘賊投箐遠遁當日兵至赤水
衛會合四川行都司指揮鄭能等官軍隨差赤水衛諳
曉夷情千戶劉本軍丁張宜等前去喚出永寧宣撫司

土官宣撫奢普把事阿烏等到於赤水就令本官差人
著令祿肇總管把事普奴撫出把事屋口等三十餘名
出官欽遵詔書內事理撫化諭令復業各立界牌分保
赤水至永寧一帶道路其永寧畢節赤水普市摩泥等
處站堡逐漸起發見在官軍人等復還本處蓋房住種
及行永寧宣撫司差委通把人等前來自崖摩泥普市
三處起蓋驛舍備辦站馬照舊應當驛傳等因備行到
職臣等看得貴州地方諸夷雜處自去歲生苗倡首至

今元惡未除遂使脅從之徒已散而復聚狐鼠之妖既降而復逆生靈荼毒邊境不寧臣等自奉命以來夙夜驚惕思竭愚衷仰仗恩威鼓舞士卒雖苗蠻屢次猖獗幸官兵所至克捷即今貴州自清平壩普定直抵畢節等處道路稍通苗蠻頗靖獨有平越清平都勻一帶夷類繁多恃強生恣其都勻僻處萬巢之中自官軍解圍掣兵之後路途仍被阻塞臣等除督見在漢達官軍往彼撫勦及委官軍分哨畢節等處地方候保定伯梁珪

調領東路大軍至日會議邊事相機而行除將獲功并陣亡官軍人等取勘另行外緣係捷音事理具題該本部官欽奉聖旨兵部知道欽此欽遵抄出到部切照貴州地方其赤水畢節清平平壩永寧普定等處自正統十四年以來為因苗賊作耗糾集人衆殺掠民財攻圍城堡所在環為盜區露宿蔽野皇上軫念蒼生特命尚書侯璉都督方瑛等充總督副總兵等官統領本都司及雲南等處官軍土兵人等前去撫捕以致賊勢屢敗

圍困漸解後侯璉病故方瑛等乃能式遵神謀作興士
氣節次督領官軍出奇設法擣取賊寨斬馘兇徒化反
側之心而為效順掃氛祲之氣而覩清明雖平越清平
之寇孽未盡剪除而畢節普市之弊壞漸已修復其所
建功績誠為可嘉若不先加褒獎何以激勸人心合無
請勅獎諭副總兵方瑛田禮叅將李友并殺賊頭目人
等令其益勵忠勤鼓舞士卒勿為驕泰務收全功會同
總督軍務右都御史王來總兵官保定伯梁瑄等將平

越等衛一帶苗蠻密為期約表裏夾攻務在盡絕以除
民害仍請勅王來梁瑄上緊統率各項官軍星馳前去
策應方瑛等殺賊不許退縮遲延因而縱賊復作如違
罪有攸歸候賊平之日通將有功官軍取勘明白備造
文冊奏繳以憑定奪陞賞緣係請勅獎諭邊將及奉欽
依兵部知道事理具題景泰元年十二月十八日奉聖
旨是欽此

兵部為捷音等事兵科抄出總督軍務都察院右都御

史王來題先節該奉勅諭湖廣貴州等處地方苗賊作
耗殺掠人民財畜肆為猖獗已嘗命將統率官軍并調
達官土兵人等在彼征勦而賊尚未息若非設法撫捕
必致師老兵疲人民不得安業其為邊方之患非細今
特陞爾前職即今爾自河南往彼總督軍務自總兵叅
贊以下悉聽爾節制聞今總兵叅將等官各率官軍分
注辰沅并貴州等處動隔千里不能會合以致難以成
功爾須親詣各官屯駐所在會同總兵官保定伯梁瑄

并副總兵都督方瑛等從長設法或分兵勦殺或併力
勦捕務在尅期殄滅盡絕以靖地方欽此欽遵臣謹星
馳前到湖廣辰沅靖州督調總兵叅將等官分領漢達
官軍土兵人等將天柱靖州銅鼓五開城武平水等處
苗賊截殺勦捕及逃遁餘賊俱各撫捕寧息節次捷音
具題去後續該節奉勅得副總兵都督方瑛等奏貴州
赤水畢節等處地方雖已稍寧然獨平越清平都勻一
帶夷類尚多負固未靖要候梁瑄調領東路大軍至日

會議相機行事勅至爾等作急計議如果湖廣賊寇稍靖可留叅將等官在彼搜勦爾等即便統領官軍星馳前去策應方瑛等併力殺賊不可托故遲延縱賊猖獗如或湖廣賊勢衆大未可掣動重兵亦聽爾等相度而行務在詳審緩急之勢不許因循延緩就易避難有誤事機賊平之日通將有功官軍取勘明白備造文冊奏繳以憑陞賞欽此欽遵臣等議得湖廣之賊莫強於天柱靖州銅鼓五開等處今既撫捕寧息別無生拗事情

合就統率官軍前去策應方瑛等併力殺賊就於沅州將官軍通行賞犒作其敵愾之氣示以攻擊之方於景泰二年二月初六日到營挨次兵糧俱進貴州興隆清平平越等處催督方瑛等軍馬前來東西會合臣等定議協謀督調總兵叅將等官分路進兵將各處為惡苗賊逐一擒勦兵鋒所指勢若摧枯各哨官軍齊進香爐山寨周圍下營嚴加固守致將偽稱苗王賊首韋同烈等捕獲捷音具題及將苗王韋同烈等解京去後為照

香爐山寨餘賊雖稱投降却要官軍追出纔方下山聽
撫領榜臣看得香爐山占據清平平越之中懸崖峭壁
形如磨盤至頂約有七十餘丈周圍計勾二十餘里其
賊環頂立寨堅築排柵三層人莫能上固為至險實乃
首惡之巢又且都勻草塘諸處之賊皆來探此事情相
為消長今官軍既已劄營圍守若即從掣退恐賊設計
量我虛實以此圍守益堅埋築排柵五層晝夜巡警不
息及有湖廣都布按三司左叅政宋欽右叅政甄完右

叅議孫節按察司副使陳質僉事沈慶署都指揮僉事
楊茂等俱各効謀奮力星夜運糧前到軍前相濟自辰
州起至貴州清平平越都勻等處水陸路程雖是遙遠
各官設法裝運將人夫船隻驢匹擺列行伍魚貫而來
千里相連絡繹不絕士卒歡心益增軍勢但緣山崖峻
陡攻打之具如飛鎗火箭弓弩之類皆不得到圍至五
十餘日其賊畏威堅執不下後有右叅將都指揮李震
并把總都指揮曹廣江澤雲南左衛指揮僉事狄武荆

州左衛正千戶黃貴等諳曉襄陽砲臣令各官提督各營星夜製造完備自五月初九日至十四日連日四面節次攻打砲石纔得到寨裂其崖壁破其房屋約計萬有餘間傷亡在山賊衆不知其數於是各賊怕死無計只得哀告我等俱係苗王韋同烈等脇從人衆今大軍攻圍正是怕死不敢下山若放我生路情愿下來投拜認納糧差臣等議得貴州之賊惟興隆清平平越都勻等處皆因賊首韋同烈等煽從為惡猖獗尤甚今賊首

既擒而餘賊圍困日久事情已極不戰而屈矣以此許其苗頭人等親到軍前審勘真實以憑招撫本月十五日在山灣溪菜潮等寨苗頭羅義等一十二名各用藤蔓纏縛懸掛下山到於右叅將李震營內懇切首罪照舊辦納糧差情愿起蓋屯堡房屋子子孫孫永遠不敢為惡等情臣等宣布詔書寬恤事理致其將虜去軍民男婦共三百五十七名口并糧俱送到官從公驗發收領苗衆皆跪拜感激盡將其山林木砍伐房屋燒毀苗

衆俱赴軍前請榜當即省令羅義等就為寨長管領各
苗回寨住種外至本月二十四日移軍清平臣會議都
勻答干爛土諸寨地接廣西南丹草塘西煙等處境屬
四川樓州比先圍城陷軍之賊雖係賊首韋同烈等糾
集肆惡而賊衆圍聚則結打草塘都勻自賊作耗以來
並無官軍抵其巢穴恩威未加未能畏服今平越清平
都勻之境固已寧息而結聚之處若不乘勢長驅且撫
且捕悉以平之譬猶止沸而不抽薪山成而虧一簣於

是按圖相機審用鄉道誓戒官軍務全已成之功無勞再役之舉於是大衆咸動各相奮勵尅期於本年六月初二日分哨前進臣督同右副總兵都督方瑛左叅將都督陳友右叅將都指揮安順并右監丞梁達守備都指揮張任貴州布政司右叅議尹弼把總都指揮汪澤任忠指揮李景周宗并諳曉鄉道平越衛指揮同知趙信等統領官軍由平越一路進抵王都堡等寨總兵官保定伯梁瑄并監察御史焦寬統調都指揮曹廣吉世

英范真等并守備黃平諳曉鄉道指揮楊鑑等統領官
軍等興隆一路進抵黃平上塘等寨及行巡撫四川本
院右僉都御史李匡將守備播州官軍就彼整搦進至
草塘彼此協應左副總兵都督毛福壽右叅將都指揮
李震叅贊軍務兵科給事中劉清并協贊軍務按察司
副使李睿等統領官軍由必撥等寨併進直抵都勻是
日啓行雖當暑月而天氣清涼將士同心軍威大振旌
旗耀日戈戟飛霜撫捕兼行軍民胥慶天道助順皇上

威德之所洽也既而進兵之處各路附近苗蠻修理橋道迎迓官軍臣遣千百戶蕭俊錢雄等齎執旗牌前去各哨傳報但是來降苗人令其各置布旗一面開寫已招二字於各寨門首懸掛不許官軍一毫搔擾後有都勻邦水及王都堡三百榜等諸處各寨之苗聞知大軍四面齊進自本月初二日至十一日率其種類牽趕牛羊驢馬趨詣軍門投降歸順者千百為羣惟恐後期且言賊首韋同烈等驅脇逼從之故今大軍到來乞全殘

命情愿辦納糧差永為良民及將比先失陷被虜軍民男婦節次送到七百餘名俱已遞發原籍原衛收領臣等謹題勅命昭宣德意開諭禍福內取其年齒可以服人者立為寨長名色令其管束苗衆保守地方舉皆感激悔罪請領榜文而去隨處軍民男婦無老無幼相聚觀駭咸謂苗賊投降未有如今日之盛其草塘等寨諸苗各榜俱有本管官司俱赴播州宣慰司等衙門聽招去訖臣惟湖廣之靖州天柱銅鼓五開貴州之平越清

平都勻興隆等處苗蠻夷類俱已撫捕寧息二處地方
皆已無虞矣仰惟皇上膺天眷之隆撫中興之運聖謨
神武震越萬方俊德成功光昭四海是以臣等庸劣之
才奉諭討賊仰仗天威得以伸犬馬之誠効涓埃之力
累月之間掃除兇慙大拯塗炭宏復疆土廓清邊方四
民樂業萬里騰歡振旅旋師凱歌載道誠萬萬年太平
之福也豈勝榮幸臣等會議得從征官軍民壯人等委
的在外年久況今天道炎熱糧餉不充俱各踈放回還

及照貴州平越清平都勻等衛被賊圍困月久官軍餓死數多即今城池空虛會同副總兵方瑛計議將四川雲南該放官軍內暫且減數量留各衛防守另行具題其前項衛分已有都指揮僉事張任陳源及湖廣靖州等處已有都督同知陳友各奉勅書提督守備外及見在達官舍民合無分俵辰沅靖等州衛安插就令陳友管領協同各衛官軍操守惟復仍令都指揮曹廣帶回臣同總兵官保定伯梁瑄俱至荊州將取勘到獲功官

軍人等功次查類文冊奏繳及副總兵叅將叅贊等官
俱於沅州等處駐劄聽候數內右叅將都指揮僉事李
震安順俱係銓註湖廣都司官負合無令其回司并內
官阮黎梁達內使龔榮張貴俱係欽差選調達官前來
殺賊等項官負惟復一體回京緣係捷音及聽候班師
事理具題又該總兵官保定伯梁瑄亦題前事本部官
欽奉聖旨既地方俱已寧靖兵部計議可留鎮守撫民
及取回名數來說欽此又該巡撫貴州大理寺右寺丞

等官王恂等題為防禦邊患等事該貴州都司等衙門
都指揮同知等官張銳等呈據金筑安撫司申景泰二
年五月初八日備把事蔣潮斌呈有賈搖寨長桑種等
報本日夜被賊約有三百餘衆各執火把進寨燒毀房
屋米倉殺傷鈕的七等虜去黃牛三十一隻馬三匹男
婦的郎一十八名口等因來報督同馬軍何用彰等追
到翁堦寨被賊在彼圍住將本處田禾用刺拖毀為是
賊寇猖獗人馬寡少不能追捕及據翁堦寨民人劉文

恭報同夜有賊三百餘徒進寨燒毀房屋米倉戮死男婦唐氏捉去男女阿妹等三人水黃牛五隻馬三匹砍死豬鷄等件當督馬兵分投追趕賊往東苗坡上去訖又於本月日期不等節據貴州宣慰安順等州司并貴州等衛軍民楊存恭等節報苗賊出沒截殺人口搶虜牛畜家財等因類呈到司已經呈蒙巡撫巡按等官轉行領兵官負督軍撫捕外今照前因會同貴州布按二司左布政使等官董和等叅看得前項賊情因是大軍

分駐各處及貴州官軍數少不能勦捕本年自正月以
來節據貴州宣慰等州司并普定等衛呈報賊情殺死
軍民男婦三百四十八名口虜去軍民男婦一千一百
五十二名口搶劫牛馬家財不計其數要行量調官軍
駐勦等因先已累呈各該總兵等官去後緣副總兵方
瑛等雖稱統領雲南四川官軍駐守貴州其見在數少
而苗賊恬不知懼仍復出沒劫掠蒙總督總兵領軍征
勦湖廣天柱等處苗賊通開路道軍威遙振而貴州遠

近苗賊聞風稍稍畏遁其永寧畢節一帶衛分有叅將李友在彼統領官軍亦藉大軍威勢頗得固守地方稍通糧運本年二月二十一日有副總兵方瑛統領官軍前去清平等處會合大軍勦賊議留雲南都司都指揮鄭儻等管領官軍分哨擺堡協同貴州官軍駐勦護運糧道比之先在官軍愈加數少又大軍攻圍香爐山寨未曾統臨貴州以此苗寇窺伺虛實復縱劫掠尤甚於前聲言等候大軍回還要來攻城等語其貴州屬衛守

城旗軍先因苗賊殘耗數多連年不得耕種饑餒切身
如此賊情不息不能安生多有逃移轉徙各處求食雖
常招撫不見回衛今在衛官軍多者不過五六百名少
者僅有二三百名城池空虛缺軍固守况苗賊巢穴相
近各衛要害若大軍不歷貴州各處征勦不惟隣近衛
分難守其永寧畢節一帶苗賊為患難測又貴州米糧
即今高貴為因軍民饑餓困斃雖累加賑濟終無克餉
况倉糧數少存留供給征進大軍直用別無接濟實難

存恤照得雲南四川官軍調征年久因聞班師逃移數
多雖有見在之數不免思鄉戀土似無戰心及照先該
總兵官官聚統領大軍僅能開通劄佐抵寨一路其新
平越等衛不曾遍歷苗賊出沒攻劫營堡幾陷城池後
有總督軍務侍郎侯璉進兵各衛方得救解不期輒便
回還掣兵其彼處一帶苗寇復作殺死四川官軍百餘
負名前項衛分道路仍復阻塞查得近奉總督軍務右
都御史王來劄付內開大軍班師在邇若不請留持久

駐勦誠恐各賊尤肆猖獗聚衆攻城無軍策應地方難
守且貴州係雲南要衝貴州倘或失守雲南關係非輕
呈乞定奪等因備呈到職查得前項賊情已經通行去
後今呈前因會同巡按貴州監察御史汪琰并都布按
三司都指揮同知等官張銳等計議相同除案令貴州
都按二司轉行右副都御史王來保定伯梁瑄外緣臣
等撫巡地方深為可慮伏望聖恩憐念邊方生靈乞勅
該部合無將雲南四川官軍著落各都司照數另撥更

替輪班征勦仍乞勅總兵官平蠻將軍保定伯梁瑤等
駐兵遍勦候賊情寧靖地方安妥奏請定奪實為軍民
之幸緣係賊情及請留官軍駐勦事理具題該通政使
司官奏奉聖旨兵部知道欽此欽遵通抄到部叅照總
督軍務左副都御史王來總兵官保定伯梁瑤具奏湖
廣之靖州天柱銅鼓五開貴州平越清平都勻興隆等
處苗賊夷類俱已寧息二處地方皆已無虞要行班師
回京而巡撫貴州寺丞王恂同巡按貴州監察御史及

都布按三司官却奏貴州普定永寧畢節等處苗賊復
縱劫掠尤甚於前聲言等候大軍回還要來攻城仍乞
梁珪等駐兵勦賊一節緣貴州地方正與湖廣辰沅靖
州等處相連所在土官衙門蠻夷種類數多易動難安
合當留意整飭庶幾地方安妥今湖廣邊境賊寇雖已
平妥而貴州地方苗蠻仍復剽掠所據王來梁珪等係
是總督總兵等官統領大軍撫捕賊寇各官舉動之間
兩處安危所繫難便輕易准令班師及看得前項殺賊

官負內都督王斌先在延綏等處守備累次攪擾邊務該本部叅奏欽調貴州殺賊今訪得本官年老目疾不堪任事及都指揮曹廣先蒙管領東昌等處達官民舍往湖廣貴州聽都督毛福壽等調度殺賊今照前項達官民舍既有毛福壽陳友等管束合無行移該府差人馳驛齎文將王斌曹廣取回赴京曹廣就留在京操練王斌合無令應襲兒男替職仍請勅王來梁瑄毛福壽陳友李震安順劉清等調度原領官軍達官人等星馳

前去貴州會同方瑛李友督同彼處都布按三司并各該土官衙門官員分投選調官軍土民人等將貴州并永寧普定畢節等處作耗苗寇設法運謀相機撫捕務在擣其巢穴而剪其根株俾患害蠲除而人民安堵明白開奏不許輕易回師及逗遛不進以致賊勢益張地方受害自取罪愆仍令王來梁珪等計議雲南四川調來殺賊官軍應否行移原衛撥人更替徑自區處施行并請勅方瑛李友同巡按貴州監察御史等官嚴督各

該官軍土兵人等約會王來梁瑤等夾攻勦殺賊寇不許推調遷延因而誤事候兩處賊情十分寧帖公同湖廣貴州巡撫巡按并三司官負會奏聽候明降班師緣節該奉欽依兵部計議可留鎮守撫民及取回名數來說及奉欽依兵部知道事理具題景泰二年七月十一日奉聖旨是欽此

兵部為軍務事兵科抄出巡撫四川都察院左僉都御史李匡題欽蒙勅令臣提督都行二司官軍撫捕播州

苗寇除欽遵外照得播州貴州相為唇齒貴州在乎南而賊附於播州播州在乎北而賊附於貴州其草塘江清水江在乎貴播之中蓋賊人之巢穴也播州雖有官軍七千餘衆僅能據烏江之險守要害之地者九處以防禦侵境之賊及隄備貴州糧道若欲勦平草塘等處賊人必得貴州大軍會合夾攻庶幾事有成效而無意外之失近該總督軍務本院右都御史王來同正副總兵叅將等官統領大軍自湖廣前來貴州臣咨請王來

先行會兵取草塘等處使播州無回顧之心就調守備
播州官軍併力前進以靖地方用緩民力續准王來回
咨開待貴州香爐山剋破之後分兵會取草塘等處後
訪得香爐山極貴州之險為照用兵之道當先取易以
振威不可先難以挫銳致被冥頑之賊負固抗敵日久
不下臣竊以貴播地方之平在此一舉若或稍却賊風
益熾臣於景泰二年五月初六日摘撥守備播州各隘
口官軍二千員名親自領去策應十四日行至龍里衛

據貴州按察司奉右都御史王來劄付開彼處軍馬足
勾調用仰本司轉行與臣領軍回還臣依呈回至播州
本年五月三十日該王來差百戶余瑾馳驛齎咨與臣
開香爐山賊人招撫下山議令副總兵毛福壽方瑛叅
將安順李震等分領官軍俱於六月初一日起程自平
越衛進一路自黃平千戶所進一路自偏橋衛進俱至
草塘會合播州官軍勦除前寇臣訪得平越與黃平到
草塘路該兩日軍行四日播州到於草塘路該六站當

於各隘口摘撥官軍四千土兵二千亦於六月初一日起程初五日到烏江初六日過江初七初八日就彼駐劄探聽貴州軍馬聲息據監察御史焦寬呈開會同都指揮曹廣等統領軍馬已到黃平臣初九日起營十一日到草塘官軍分作前後三營土兵分作左右兩營並無貴州三路軍馬來致被彼處賊人眇視孤軍深入重地日夜在於西山吹角吶喊臣恐各賊邀截後路拘喚經過去處聽招寨長到營諭以利害禍福給與賞勞

令將精壯人丁隨軍征進杜其異心其餘以次人丁守
備糧道戒諭官軍死戰則生又有陞賞之榮退縮則雖
逃生而又有犯法之辱官軍自知深入重地援兵未至
莫不激勸奮勇本月十三日夜賊人不知其數來劫前
營官軍知覺奮勇對敵斬首九級賊人退散勇壯官軍
生擒賊四人十五日賊人約至二萬餘衆前來拒敵前
營都指揮僉事李銘領軍當其中後營指揮同知陳瑄
李經等領軍扼其左中營指揮使李璿同知李文郭振

等領軍扼其右土兵隨官軍之後一正兩奇四圍夾攻
官軍奮勇効死一戰斬首四百四十五級生擒三人餘
賊丟棄鏢弩挨牌盔甲盡行潰散官軍追逐三十餘里
焚其巢穴煙焰漲天獲到被虜軍民男婦二十一名口
軍勢奮迅賊鋒披靡若得貴州官軍加以數千策應則
草塘等處地方可不一月平定臣於十六日差健步前
去各寨招安各寨苗頭前來黃平千戶所取軍前來策
應及差土人前去各寨招安各寨苗頭漸來納款續據

本所申稱總督總兵等官已經班師去訖為是孤軍及
恐苗情多詐只得回還叅照會兵勦賊最為重事雖是
時刻不可稽遲今右都御史王來約臣進兵深入重地
却乃班師回還非獨欲陷臣致死實欲損朝廷之軍馬
誤朝廷之地方原其立心實是陰險幸藉朝廷洪福全
勝旋師於本月十九日起營回還緣係捷音及照右都
御史王來亦合有罪具題該本部官欽奉聖旨兵部知
道欽此欽遵抄出到部查得先該總督軍務右都御史

王來總兵官保定伯梁瑄各奏湖廣之靖州天柱銅鼓
五開貴州之平越清平都勻等處苗蠻夷類俱已撫捕
寧息二處地方亦皆無虞要行班師回京及該巡撫貴
州寺丞王恂同巡按貴州監察御史都布按三司官又
奏貴州金筑安撫司并普定畢節等衛苗頭復縱劫掠
尤甚於前聲言候大軍回還要來攻城仍乞梁瑄等駐
兵勦殺等因具題本部已經覆奏請勅王來梁瑄等調
度原領官軍達官人等星馳前去貴州撫捕賊寇續該

王來又奏貴州三司不當將前項賊情奏報等因本部
為照貴州係是重地其都布按三司等官既見賊寇侵
擾地方不得不奏王來係總督軍務官負不思自己不
能統兵前進肅清邊境却歸罪於別人事屬不當又經
覆奏就令差來奏事人馳驛齎文與王來梁瑤等作急
督領官軍前去會合右副總兵都督方瑛照依勅內事
理設法撫捕苗寇去後今抄前因臣等切惟受上命而
弭寇安民者責任之至重挾姦計而玩寇殃民者法令

所難容照得都御史王來猥以小才驟膺重任職都風紀總督兵戎正宜竭忠盡誠運謀戮力掃除作耗之苗蠹慰安遠方之黎庶必候事盡寧妥方可奏請班師豈期本官懷姦挾詐長寇殃民惟陰險之是圖棄信義而弗顧既行移巡撫四川僉都御史李匡領調官軍到於貴州草塘會合勦賊及至李匡督率官軍冒險遠進累遇賊衆而王來却乃先行班師並不發兵策應以用兵為兒戲視邊務如等閒俾李匡進退兩難使孤軍深入

無援若非李匡等仰仗天威奮勇敢戰萬一寡弱不支
誤中賊計非惟益賊寇之縱橫抑且遺蠻夷之恥笑所
據王來不忠不義陷人死地止知遂已之姦謀不恤朝
廷之大計其為罪惡實等淵海及照總兵官保定伯梁
瑄與王來彼此相資同惡相濟不候賊寇殄滅輒便一
同班師原其情犯厥罪惟均况今邊方多事軍務為先
王來梁瑄為總兵之官而壞法玩事如此若不行提問
罪無以大彰天討垂戒將來合無令法司將王來梁瑄

通行提取赴京問罪仍乞聖裁另選忠誠智勇文武大臣各一員代替王來等充總督總兵前去貴州撫捕苗寇如其聖恩寬大未即加誅亦乞請勅切責王來等令其改過遷善奮勇設謀務在剪滅遺寇候事畢另行提取問罪及請勅獎勵僉都御史李匡旌其能恤隣邦之患躬提孤軍深入又能殺敗賊寇擒斬賊首當益勵忠勤用心教練軍士聽候調用仍將殺賊有功官軍取勘明白從實造冊開奏以憑定奪陞賞緣王來梁瑤係欽

命總督總兵官負及奉欽依兵部知道事理具題景泰二年七月二十七日掌部事少保兼本部尚書于謙等於奉天門奉聖旨李匡雖奏王來梁瑄如此姦謀玩寇殃民未知虛實邊境正用人之際便寫勅去著上緊領兵前去貴州殄滅賊寇將李匡奏的事情與他看著從實回將話來欽此

兵部為軍務事兵科抄出總督軍務等官都察院右都御史王來等題景泰二年八月十四日節該欽奉勅諭

巡撫四川左僉都御史李匡奏爾等差人往彼期約於
六月初一日三路進兵俱至草塘會合播州官軍勦除
苗寇及李匡領軍到彼而爾等班師致令孤軍無援幾
陷賊計朕覽貴州三司并李匡所奏則彼處地方多未
寧靖而爾等不行用心殄滅輒便班師玩寇殃民罪不
容恕但今用人緊急姑記爾罪勅至爾等作急統領官
軍前去貴州將前項有賊地方逐一搜勦盡絕以除邊
患不許頃刻稽遲縱令各賊復肆猖獗有誤事機仍先

將李匡所奏事情從實回話奏來處置欽此欽遵續准
兵部咨該巡撫四川左僉都御史李匡題欽蒙勅令臣
提督四川行都二司官軍撫捕播州苗寇除欽遵外照
得播州貴州相為唇齒貴州在乎南而賊附於播州播
州在乎北而賊附於貴州其草塘江渡三百勞清水江
在乎貴播之中蓋賊之巢穴也播州雖有官軍七百餘
衆僅能據烏江之險守要害之地者九處以防禦侵境
之賊及隄備貴州糧道若欲勦平草塘等處賊人必得

貴州大軍會合夾攻庶幾事有成效而無意外之虞近該總督軍務右都御史王來同正副總兵叅將等官統領大軍自湖廣前來貴州臣咨請王來先行會兵攻取草塘等處使播州無回顧之憂就調守播州官軍併力前進以靖地方用緩民力續准王來回咨開待貴州香爐山克破之後分兵會取草塘等因後訪得香爐山極貴州之險為照用兵之道當先取易以振威不可先難以挫銳致冥頑之賊負固抗敵日久不下臣以貴播地

方之平在此一舉若或稍却賊風益熾臣於景泰二年五月初六日摘撥守備播州各隘口官軍二千負名親自領去策應十四日行至龍里據貴州按察司呈奉右都御史王來劄付開彼處軍馬足勾調用仰本司轉行與臣領軍回還臣依呈回至播州本年五月三十日王來差百户余瑾馳驛齎咨與臣開稱香爐山賊人招撫下山議令副總兵毛福壽方瑛叅將安順李震等分領官軍俱於六月初一日起程一路自平越衛進一路自

黃平千戶所進一路自偏橋衛進俱至草塘會合播州
官軍勦除苗寇臣訪得平越與黃平到草塘常行路該
兩日軍行路該四日播州到於草塘路該六站各隘口
摘撥官軍四千土兵二千亦於六月初一日起程初五
日到烏江初六日過江初七初八日就彼駐劄探聽貴
州軍馬聲息據監察御史焦寬呈開會同都指揮曹廣
等統領軍馬已到黃平臣於初九日起程十一日到草
塘官軍分作前中後三營土兵分作左右兩營並無貴

州三路軍馬來致被賊人眇視孤軍深入重地日夜在於四山吹角吶喊臣恐各賊邀截後路拘喚經過去處聽招寨長到營諭以利害禍福給與賞勞令將精壯人丁隨軍征進杜其異心其餘以次人丁守備糧道戒諭官軍死戰則生又有陞賞之榮退縮則死雖或逃生而又有犯法之辱官軍自知深入重地援兵未至莫不激勸奮勇本月十三日夜賊人不知其數來劫前營官軍知覺奮勇對敵斬首九級賊人退散生擒四人十五

日賊人約聚二萬餘衆前來拒敵前營指揮僉事李銘
領軍當其中後營指揮同知陳瑄李經等領軍出其左
中營指揮使李璿同知李文郭振等領軍出其右土兵
隨官軍之後一正兩竒四圍夾攻官軍奮勇効死一戰
斬首四百四十五級生擒三人餘賊丟棄鏢弩盔甲挨
牌盡行潰散官軍追逐三十餘里焚其巢穴烟焰漲天
獲到被虜軍民男婦二十一名口軍勢奮迅賊風披靡
若得貴州官軍加以數千策應則草塘等處地方可不

一月平定臣於十六日差健步前去黃平千戶所取軍
策應及差土人前去各寨招安各寨苗頭漸來納款續
據本所申稱總督總兵等官已行班師去訖為是孤軍
或恐苗情多詐只得回還叅照會兵勦殺賊寇最為重
事時刻不可稽違今右都御史王來約臣進兵深入重
地却乃班師回還非獨欲陷臣致死實欲損朝廷之軍
馬誤朝廷之地方原其立心實是陰險幸藉朝廷洪福
全勝旋師於本月十九日起營回還緣係捷音及照右

都御史王來亦合有罪係掌握兵柄大臣通行具題伏乞聖裁該本部官欽奉聖旨兵部知道欽此欽遵抄出到部查得先該總督軍務右都御史王來總兵官保定伯梁瑤各奏湖廣之靖州天柱銅鼓五開貴州之平越清平都勻等處苗蠻夷類俱已撫捕寧息二處地方皆已無虞要行班師回京及該巡撫寺丞王恂同巡按貴州監察御史都布按三司又奏貴州金筑安撫司并普定畢節等衛苗賊復縱劫掠尤甚於前聲言候大軍回

還要來攻城仍乞梁瑤等駐兵勦殺等因具題本部已
經覆奏請勅王來梁瑤等調度原領官軍達官人等星
馳前去貴州撫捕賊寇續該王來又奏貴州三司不當
將前項賊情奏報等因本部為照貴州係是重地其都
布按三司等官既見賊寇攪擾地方不得不奏王來係
總督軍務官員不咎自己不能統兵前進肅清邊境却
乃歸罪別人事屬不當又經覆奏就令差來奏事人馳
驛齎文與王來梁瑤等作急督領官軍前去貴州會合

右副總兵都督方瑛照依勅內事理設法撫捕苗寇去後今該前因臣等竊惟受上命而弭盜安民者責任至重挾姦計而玩寇殃民者法令難容切照右都御史王來猥以小才驟膺重職任都風紀總督兵戎所宜竭忠盡誠運謀戮力掃除作耗之苗蠻慰安遠方之黎庶必候事盡寧妥方可奏請班師豈期本官懷姦挾詐長寇殃民惟陰險之是圖棄信義而弗顧既已行移巡撫四川僉都御史李匡領調官軍到於草塘會合勦賊及至

李匡督率官軍冒險遠進累遇賊衆而王來却乃先行
班師並不發兵策應以用兵為兒戲視邊務如等閒俾
李匡進退兩難使孤軍深入無援若非李匡等仰仗天
威奮勇敢戰萬一寡弱不支誤中賊計非惟益賊寇之
縱橫抑且遺蠻夷之恥笑所據王來不義不忠陷人死
地止知遂已之奸謀不恤朝廷之大計其為罪惡實等
淵海及照總兵官保定伯梁瑄與王來彼此相資同惡
相濟不候賊寇殄滅輒便一同班師原其情犯厥罪惟

均況今邊方多事軍務為先王來梁瑤為總督總兵之
官玩法壞事如此若不行提問罪無以大彰天討垂戒
將來合無令法司差人將王來梁瑤通行提取赴京問
罪仍乞聖裁另選忠誠智勇文武大臣各一員代替王
來等充總督總兵前去貴州撫捕苗寇如其聖恩寬大
未即加誅亦乞請勅切責王來等令其改過遷善奮勇
設謀務在殄滅遺寇候事畢另行提問及請勅獎勵李
匡旌其能恤隣邦之患躬提孤軍深入又能殺敗賊寇

擒斬賊首當益勵忠勤用心教練軍士聽候調用仍將
殺賊有功官軍取勘明白從實造冊開奏以憑定奪陞
賞等因具題該本部官奉聖旨李匡雖奏王來梁瑤如
此姦謀玩寇殃民未知虛實邊境正要用人之際便寫
勅去著上緊領兵前去貴州殄滅苗賊就將李匡奏的
事情與他看著從實回將話來欽此欽遵通行備咨到
臣除行總兵官保定伯梁瑤欽遵外臣來查得景泰二
年二月內准巡撫四川左僉都御史李匡咨開貴播賊

徒相為依附播賊非貴州之賊附集其衆不敢屯聚方
今貴州之賊重在清越播州之賊結在草塘草塘雖隸
播州其協草塘之民以非為者又皆平越等處之苗令
臣分兵一二萬令一總兵自興隆取路前來直抵岑貴
與李匡會合併力克復草塘等因彼時臣與總兵叅將
等官俱於湖廣靖州回軍出至沅州犒賞官軍前進貴
州議得貴州之賊惟平越清平都勻興隆最為首惡之
處况賊首韋同烈等一向在彼圍城截路欲依李匡之

計分兵取路先進草塘以安四川播州之境則彼官軍固為快意可以釋其備禦之久然貴州之平越清平興隆一帶賊寇方且阻截大路邀奪糧餉草塘何由而進縱萬一得進我之官軍如在甌中何由而出決然不可必須大軍且於大路前進興隆直抵清平平越會合副總兵方瑛等軍馬將附近大路為惡苗賊東西夾攻以通糧道候前項去處道路疏通撫捕平靖兵糧並進其勢自屈不過掃蕩撫捕而已備由回咨去訖臣等統調

大軍於本年二月二十二日至二十三日進至興隆果
有賊首苗王韋同烈等聚徒三萬餘衆逞克拒敵及砍
橋奪路當督官軍奮勇殺賊隨即乘勢直抵清平會合
副總兵都督方瑛等官軍分哨長驅勢如拉朽各路苗
賊無不望風披靡既而躡探得賊首苗王韋同烈等因
被官軍殺敗却乃般上香爐山寨又欲糾合賊衆來拒
官軍臣等又會同計議香爐山寨固為至險是乃賊衆
觀望之地今賊首韋同烈等奔潰去彼又欲聚衆倘或

持久其勢益強卒難取勝莫若乘其敝敗衆心分攜之
際嚴督各哨官軍俱進香爐山寨併力齊攻庶賊首可
擒而餘賊可滅於是戒誓各哨官軍鼓勇奮銳分路攻
打為惡苗寨徑抵香爐山下週圍列營齊攻夾擊仰賴
皇上聖威神武致將賊首韋同烈等擒獲餘賊聽招間
本年五月初十日又據貴州按察司呈奉李匡劄付近
聞大軍攻圍香爐山寨而彼蠢然無知賊人尚猶據險
未下今當職擇於本月初六日率領官軍前來策應合

先行劄付本司轉報總督總兵等官知會如是克破請作急報知以免官軍往復等因備由具呈前來彼時臣等看得香爐山寨賊首已擒餘賊將下況見在官軍已勾攻圍今李匡既稱要行作急報知以免往復必是未曾起行況今天道炎熱未免虛費糧餉以此行文報知阻其前來免致軍士往復後於本月十二日香爐山寨苗羅義等率衆下山聽招臣等逐一撫令安業至本月二十四日領軍出至清平又行會議貴州所屬興隆清

平平越至西極險之處俱已勦捕寧息其都勻草塘雖
係偏隅即合分兵撫捕以靖地方庶可班師臣來督調
副總兵叅將等官都督方瑛等統領官軍於平越一路
臣珏統調都指揮曹廣吉世英并監察御史焦寬於興
隆黃平一路俱進草塘左副總兵都督毛福壽等統領
官軍俱進都勻仍行報知李匡將彼守備播州官軍前
來協應俱於六月初一日起行前進會合撫捕自本月
初一日至初八日節准都督方瑛等手本開將平越所

進地方王都保等處苗頭阿郎等及黃平安撫司太平等寨寨長甘把揚等俱已招撫領榜及開草塘青池西煙等處各寨苗衆等俱稱四川播州管轄俱往原管官司聽招去訖及據監察御史焦寬呈將前項緣由已呈李匡知會外候至本月初十日臣來於清沾患痢疾有都督方瑛到臣歇處說稱草塘苗民怕當兩處差撥以此要去播州聽招別無生拘事情會議間又准李匡咨稱四川守備官軍五年不曾更替饑寒切身死亡相繼

在外征進疲弊之甚為照香爐山之賊既已投降都勻
草塘必皆易取則是地方可平班師可必令臣來會同
總兵等官早將四川都司官軍放回等因臣等議得四
川貴州地里相叅至為鄰近若將四川官軍先放其湖
廣諸處官軍苦涉尤多則又何以拘執况大軍之衆進
退一律豈可偏意自由以妨大計臣等不曾准允候至
十四日因彼絕其消息回報臣又備將前項緣由及回
軍事情行文差百户余瑾馳驛齎報為是天道酷熱疫

病大作又况糧餉不充官軍大衆勢不能駐且貴州以後別無事情來報以此公同副總兵叅將叅贊等官會議明白疎放官軍將前情各具本奏請定奪班師並無別項情由豈期李匡懷此深機逞功却奏臣等立心陰險欲損軍馬欲誤地方臣等叨領總督總兵之任使有損軍誤事臣等之罪何所容逃此李匡蓋是嗔怪臣等不從其計先進草塘致其在彼守候日久又且阻其回軍不曾得與克平香爐山寨之功及不先放四川官軍

以此結怨加詞過毀借使草塘之賊可以孤軍進勦則播州守備官軍在彼經及三年咫尺一江猶且不敢過岸若非湖廣貴州官軍東西會合擒獲賊首韋同烈等及將清平平越興隆并香爐山寨一帶地方勦撫寧息李匡未必肯來及至行文報知尚且遷延直待苗衆聽招之後纔方向隙乘虛以計取功臣等又看得李匡等奏稱彼處苗賊眇視孤軍深入重地日夜在山吹角吶喊恐賊邀截後路拘喚經過去處聽招寨長到營諭以

利害禍福給與賞勞令將精壯人丁隨軍征進以次人丁守備糧道一節似非的實既是深入重地賊人眇視孤軍恐有邀截緣何彼處又有聽招寨長與其同處一類之人肯出精壯人丁隨同征進以次人丁守備糧道恐無是理其後又稱差人前去招安各寨苗頭漸來納款為是孤軍只得回還此等情詞無非要見草塘之地皆李匡撫捕之功無有臣等軍威之力况草塘之苗先該副總兵叅將開稱俱往四川播州該管官司聽招去

訖各行李匡知會今其苗既已聽招亦各放心自在忽見李匡官軍復來如何不驚惶吶喊防備抵禦是固情理之常若草塘之苗未曾聽招之時李匡官軍守備年久豈能領軍獨進前項事情軍民共知瞭然明白實難虛妄前者臣等具題聽候班師本內俱已開陳詳悉但臣等識見愚闇不能預防李匡陰謀致其羅織如此罪重丘山伏望聖恩憐憫特加寬宥臣等下情尤乞聖明俯垂鑒察臣等益當盡心竭力統調官軍前進貴州將

未靖地方逐一撫捕以除邊患及奉欽依李匡雖奏王
來梁珏如此姦謀玩寇殃民未知虛實邊境正要用人
之際便寫勅著上緊領兵前去貴州殄滅苗賊就將李
匡奏的事情與他看著從實回將話來事理臣等不勝
戰慄感激具本及將李匡節次原來咨文及臣來回文
謄寫隨本封進具題該本部官欽奉聖旨該衙門知道
欽此欽遵抄出到部案查先該巡撫四川左僉都御史
李匡奏前事已經通行總督軍務右都御史王來總兵

官保定伯梁瑄令其照奉欽依內事理從實回話去後
今抄前因叅看得王来回奏及繳到與李匡往復文移
內事情其王來既於本年五月內克破香爐山寨出至
清平會議得都勻草塘雖係偏隅即今分兵撫捕以靖
地方庶可班師王來督調都督方瑛等官軍於平越一
路梁瑄統調都指揮曹廣等官軍於黃平一路俱進草
塘仍報知李匡將彼守備播州官軍前來協應俱於六
月初一日啓行會合撫捕後李匡果於初一日領兵起

程十一日到草塘地界彼時王來正當督兵倍道兼行前去策應設或人衆路遠倉卒難至都指揮曹廣軍馬已到黃平去草塘師行路止四日亦當飛檄曹廣領兵赴援表裏夾攻則草塘等處苗寇或可勦無遺類計不出此却乃懷挾奸詐嫉忌功能不思李匡孤軍深入重地寇賊環繞進則不可退又不能三軍之命懸於毫髮其望揀援甚於水火而王來自五月二十四日到清平至六月十四日前後共二十日端坐一城稱疾不行啓

發又不督令別路官軍前進止憑都督方瑛手本及據本官口說苗民聽招等因輒差百户余瑾馳報李匡回軍又與梁瑄將大軍擅自踈放以致賊黨未平地方未妥及照王來身任總督手握重兵緩急賊情所宜知悉清平相離草塘不甚遠豈無差去哨探之人却奏李匡絕無消息顯是躡探得李匡人馬已臨城境忌有成功故意掣回大軍陰欲壞彼之事逞已之能又看得繳到與李匡往復文移內報知李匡要伊領兵前來草塘

協應會合撫捕賊寇緊要咨文隱匿不曾奏繳却將李匡今年正月內與伊促兵殺賊咨文內並不干涉者混粘奏繳又將五月三十日李匡與伊要取回四川官軍咨文奏改於六月十一日到清平會議之後又不輸情服罪調弄繁文雖曰展轉彌縫終係辭理不直似此熒惑聖聽遮掩已非奸欺不忠行險誤事合當治罪再照李匡任風紀之要職膺巡撫之重寄明知四川播州與貴州都勻等處相連苗賊為惡非止一日城池被其圍

困人財苦於殺掠擁兵觀望不肯拔恤聞知王來等大軍已於今年二月間起程進至香爐山寨等處撫捕賊寇漸已成功李匡至五月間纔領軍前去策應顯是虛張聲勢意圖邀功及王來回報彼時官軍已勾攻圍止回李匡官軍中心不平却將四川調去貴州殺賊官軍擅自移咨要行取回各逞私忿不顧大計亦合有罪但王來現今總督軍務往來貴州湖廣地方撫捕賊寇李匡巡撫四川俱係重事合無令法司差人將各官通提

赴京問擬明白奏請發落另行奏差忠誠才智文職大臣二員更替王來李匡整理事務惟復且不提問各令請勅切責王來李匡并梁珪等今後各要洗心滌慮改過遷善協心比志以副朝廷之託運謀戮力以安反側之患其有未平賊徒各照地方務在設法撫捕果有地界毘隣勢必兩相應援必須揀災卹患你我相濟以圖成功以祛民害不許似前疑忌矛盾互相訐構是非有失大體致誤軍務如違一體治以重罪緣係具奏回話

及奉欽依該衙門知道事理具題景泰二年九月初四日奉聖旨王來李匡各逞私忿不顧朝廷大事理當究問今邊境未寧且寫勅切責他每著用心整理邊務再不許互相訐構事發不饒欽此

兵部為地方賊情事兵科抄出廣西按察司題准本司僉事蕭鑾關據柳州府融縣申該里老盧志亮等呈節被羅城縣武陽等鄉首賊韋萬保等并本縣西山等處生獐梁非二等招邀賊衆千萬為徒流劫鄉村殺虜人

口自景泰元年正月至本年終殺虜男婦四千二百六十三名口節經具告未蒙勦戮止是招撫前賊面從心異愈肆劫掠又自景泰二年正月起至本年七月止殺虜男婦四千二百九十八名口牛財房屋燒搶一空今蒙大軍征勦慶遠地方呈乞轉達移兵順勦等因又節據本縣并本府羅城縣申各據民人謝安奴等告景泰二年十一月十二月日期不等節被首賊韋公行單期鶴等糾合思恩府流來賊人岑勒陳等前來圍閉村寨

殺虜人口今思岑勒陳係思恩府知府岑英屬兵其父
岑公盤見跟知府用兵征進深知消息等因又准慶遠
府牒呈據天河縣民羅錢等告被首賊韋善智等殺虜
人口及節據本府宜山縣申據里老覃善通等呈告本
縣徭撞村峒先因作耗撥與思恩府管轄今又復反蒙
大軍抵巢戮其首賊俱未全復間有出官向化者終是
面從心異近於景泰三年正月日期不等又劫本里中
里等里古邕隴黑陳河大塘等村殺虜人口搶掠牛財

聲言軍退又要殺害一縣乞調官軍搜殺等因備申移
關到司又准本司僉事王驥關據梧州府里老民人涂
元通等告景泰二年十二月十一日有本府赤水鎮巡
檢司飛報蠻賊在於本府藤縣地面打劫至十二日有
賊八十餘名到本府城外殺死人口二十七名口虜去
男婦八十餘名口燒毀民房二百二十六家延燒城上
房樓二千餘間將靖江王府奉祠周源虜去有梧州千
戶所千戶李順關閉城門任從賊人劫殺自卯至未不

肯開門救護待賊過江住劄索要銀兩取贖人口有本
府官用銀將周源贖回又據蒼梧縣儒學訓導郭紳呈
被賊八十餘名在城外搶劫有千戶李順在家因娶男
婦設席會飲將城門關閉不肯領軍出城其巡檢張進
先知賊人流劫却令民歛於城內蓋房般移家小入城
亦不領兵出城以致將本職家下妻子大小一十一口
盡數虜去且如丁憂知縣李素在家率領家人各執器
械殺退賊人及民歛莫以寧執鎗在街賊不敢鬪等情

移關到司又准平樂府牒呈據梧州府蒼梧縣民人陳廣昌告用船裝載軍人尹釗等鹽貨前往廣西景泰三年正月初六日行至本府地名猪牙灘遇見蠻賊一羣各執刀弩行兇打劫軍人童昇被趕落水身死本月十一日蠻賊又到本府廣運驛殺死水夫一名將站船燒毀等因又准潯州府牒呈據桂平縣木盤浦巡檢司申景泰三年正月初五日見得地名武宣陸廟有小船四十餘隻裝載賊人各帶鎗刀不知數目又有小船二十

餘隻裝載妻小亦到說稱我們有一千人入龍山去了
今有二千來合衆去打各處鄉村又准梧州府牒呈據
蒼梧縣申景泰三年正月十三日有大腦山強賊黃大
用等約有五百餘名流劫本鄉地名小水邏棹等一十
二村財物殺死民人梁新等四十二家人口男婦三十
六名口虜去耕牛一百二十四隻燒毀房屋四十二家
禾倉四十三座等因牒呈到司除行左副總兵都督僉
事武毅等及行各巡檢司整搦兵牌嚴加隄備外照得

即今廣西各府地方蠻賊肆暴略無畏懼蓋因今次行師多在招撫其為惡首賊韋萬秀等俱已遠遁不曾被勦以此各處賊人愈加肆志緣此等徭蠻稟性冥頑可以威服而不可以德化故軍威盛則受招軍威退則肆暴經年累歲習以為常必須痛加勦殺方可制服廣西人民被害至極伏望皇上重念邊民乞勅左副總兵都督僉事武毅等將前項蠻賊痛加勦殺以除民患及照千戶李順遇賊畏縮關閉城門致賊人殺虜人口數多

合當提問具本該通政使司官奏奉聖旨兵部知道欽
此欽遵抄出到部叅照廣西按察司奏稱前項賊勢猖
獗蓋因今次行師多在招撫不曾勦殺以此賊人肆志
要乞總兵官痛加勦殺一節切緣華夏蠻貊之人皆係
朝廷赤子兵刑二者固不得已而施貴在恩威並行然
後人無不服故防奸禦侮之道固難一於招撫亦難專
於誅殺蓋可撫則撫可捕則捕貴在相機而行隨宜而
處豈可專務威刑果於殺戮又况各項賊寇比先俱係

良民或因饑荒衣食所窘或因不才官吏侵漁激變以致結聚為非連歲不已總兵等官又行怠忽玩寇不即撫捕寧息因而賊勢盛張人愈受害合無差人馳驛齎文與廣西提督軍務刑部左侍郎李棠公同副總兵都督僉事武毅等督同都布按三司委官調度官軍民快人等將前項賊寇務在相機設法安撫勦捕日下盡絕以除民患不許猶豫狐疑因循退縮以招撫為名縱賊寇之猖獗或行師不以紀律殺害良民致貽激變以誤

藩方大事臨期卒難整飭如違一體叅究治罪其奏梧州千戶所千戶李順遇賊退縮關閉城門致賊殺虜人口數多要行提問顯是李順無勇無謀失誤事機合當懲治以警其餘合無行移都察院轉行巡按廣西監察御史將李順提問如律監候具奏發落緣係處置賊情叅問軍職及奉欽依兵部知道事理具題景泰三年四月初九日奉聖旨是欽此

兵部為邊情危急事兵科抄出左副總兵都督僉事武

毅等題據慶遠府備宜山縣申該本縣古陽鄉民入謝包等告景泰三年二月初十日被思恩府述晁等鄉首賊韋萬秀覃朝海李應填韋法勝等一千餘徒各帶衣甲張打金鼓旗號分投攻打蓮塘等四村殺死父弟謝宗舉等三十六名虜去男婦六十九名口將父謝宗舉等四名綁去賊營刺血祭旗營內寫書一紙罵稱父宗舉賣地方與岑瑛先作反皆因科擾重大激變後蒙宜山縣招安你又告大軍來殺我你衆人不去告討地

方還我務要殺絕一縣良民得此切思本縣作耗地方
比先撥土官知府岑瑛管治以蠻治蠻止望軍民安業
不期自撥之後科擾重大因此激變殺害軍民今知府
岑瑛見賊數多坐視不救等因又據本府備宜山縣申
該古陽鄉民人石應等狀告本年二月十一日寅時分
被首賊韋萬秀等約有一千餘徒騎馬各執鎗刀圍閉
鄉寨殺死民人莫永端二十四名生捉謝暖等三名祭
旗虜去男婦八十三名口劫去牛隻燒毀房屋劄營二

日韋萬秀大叫若退地方與彭大人同宜山縣我每再
不做賊若不退地方仍與岑知府管你百姓休望種田
務要殺截等因又據本府備宜山縣申該民人陳子狀
告被首賊韋萬秀等五百餘徒圍閉小廖等寨殺死莫
敬方等六名乞撥官軍救應等因備申照得近准右叅
將都督同知孫麒咨本年二月十八日有賊二千餘徒
圍劫德藤小廖寨及稱要行打劫城堡關廂鄉村又有
洛東田心等村賊人約有一千餘徒搶去大曹驛放草

馬二匹賊在提點江埠聚劄首賊韋萬秀又招天河縣
富祿白藤魚良等處賊人蒙陳萬等隨同節次殺虜人
財四面逢起要添調官軍前去截殺等因臣會同巡撫
廣西兼督軍務刑部右侍郎李棠巡按廣西監察御史
張瀾廣西布按二司布政使夏時按察使王增祐等議
得先該首賊韋萬秀等聚衆作耗不服招撫仍復聚衆
殺虜不息又經調撥官軍土兵於景泰二年冬月抵巢
征勦有首賊韋萬秀等逃遁不獲至景泰三年正月土

兵回還農種存留右叅將孫麒統率原征官軍四千三百餘名在於慶遠河池駐劄哨捕及將地方暫令土官知府岑瑛撫管聽候并將征勦前賊勘撥地方緣由會本具題去後今報賊人蠢起殺害人民要添官軍截殺及賊稱要退地方與彭都指揮同宜山縣撫治不願岑瑛管束等情行間又准右叅將孫麒咨據岑瑛呈要將前地方退與宜山縣招撫本職領軍回府聽調等因除取調都指揮同知彭英齋榜前去招撫以順夷情就留

本官在彼常川哨守查得原領抵巢勦賊官軍除調到
土兵及分府各處緊要地方官軍難以摘動止有調征
官軍六千一百餘名内存留右叅將孫麒處官軍四千
三百餘名及咨委左叅將署都指揮使范信摘領官軍
一千五百餘名前去尋梧二府策應緊急賊情在彼亦
難摘離臣原領并回柳州官軍共一千六百餘名又因
來賓柳州等處賊徒出沒陸續調去策應即今臣處止
存官軍六百餘名別無官軍調去慶遠策應賊人四散

傳遞木刻招聚徒衆守把險要江路日加滋蔓况柳州府馬平遷江等處及慶遠府忻城天河河池等縣招撫向化徭獍雖絡繹差人省諭安業各蠻原係狼子野心倘窺伺邊備不固被其扇惑隨同為惡變生不測失誤地方事勢至此尤難拯救伏望聖恩憐念邊方乞勅兵部量加添調官軍前來策應庶解邊民倒懸之苦緣係邊境危急事情具本該通政使司官奏奉聖旨兵部看計議來說欽此欽遵抄出到部查得先該慶遠府宜山

縣知縣張宗等奏稱本縣原有述昆等鄉民撞村分洪武年間開設管治正統六年間有老人黃祖記等交結思恩府知府岑瑛奏蒙總兵等官將前項地方撥與岑瑛管束自撥之後首賊韋萬秀等不服岑瑛管束流劫不已要照舊仍屬宜山管束等因行該副總兵都督僉事武毅等回奏會議得若依張宗等所奏將述昆等鄉賊峒退還本縣誠恐原撥過武緣上林地方撞撞數多一槩做倣動搖為患非小合仍令岑瑛管束等因具題

抄出本部為照即今副總兵等官武毅等會議回奏要
令岑瑛管束合當依擬已經奏准行移武毅等照依所
擬事理施行續又該武毅同廣西都布按三司等官節
奏彼處賊情緊急又經不次具奏行令武毅等務要調
度官軍上急設法撫捕并催督廣東等處原調廣西操
備官軍作急赴廣西聽調去後今抄前因叅照宜山縣
述昆等鄉地方既是夷情如此激切不願岑瑛管束培
剋斂怨不能奉公撫恤而副總兵武毅等比先亦各因

循苟且不曾仔細體訪下情符同回奏今岑瑛管治不
旋踵間而賊首韋萬秀等不甘因而作耗貽害良善武
毅等却奏又要撥還宜山縣管治前後所奏不同彼此
矛盾不一蓋因各官平日循私廢公處置乖方以致激
變賊寇縱橫為惡及至厲階已成賊勢猖獗又不設法
撫捕只稱官軍數少兼且廣西賊情經今二三年之上
流劫鄉村殺掠人財良善受害不可勝言而武毅等顧
乃因循月日擁兵自衛邊務民患畧不究心近該廣西

按察使王增祐等具奏彼處賊勢猖獗蓋因今次行師多在招撫以此賊人肆志等因於此可見武毅等在彼不能振肅兵威懾服奸宄以副朝廷之委託以為地方之保障似此無勇無謀玩寇誤事不曾立有寸功專務虛文延調所為若此人何賴焉且廣西都司查得官軍舍餘共有四萬八千八百之上又有民快人等相兼調用及有廣東湖廣輪班操備官軍不能設法調遣又要量添官軍且附近廣西如湖廣等處俱已調撥官軍前

去廣西操備殺賊見今各處自有賊寇生發俱有官軍
撫捕巡撫湖廣右副都御史李實尚且具奏要將該調
廣西官軍存留本處本部具奏不曾准理揆之事體委
的別無相應之人堪以添調無從區畫合無令該府差
人馳驛齎文與武毅公同侍郎李棠等計議設法將述
昆等鄉地方如果衆情不願岑瑛管束及岑瑛亦願退
還令其照舊退與宜山縣撫管其各賊寇務在調度見
有官軍人等申明號令賞罰作興士氣人心相機撫捕

日下務要寧息具由回奏不許畏縮無謀坐視民患不
即拯救以致地方踈虞人受荼毒如違定行叅奏治罪
仍令該府行移湖廣廣東二都司將輪該廣西操備官
軍照數依期督發前去操備及各將調去官軍數目星
馳回奏不許遲違有誤軍務緣奉欽依兵部看計議來
說事理具題景泰三年四月初十日奉聖旨是欽此
兵部為軍務等事兵科抄出總督軍務都察院右都御
史王來題看得湖廣貴州實為唇齒之邦徃因苗蠻作

耗攻圍城池官軍被害殘耗數多又且勢分力寡防禦不敷致使猖獗莫能克伐昨蒙勅命臣來總督軍務臣珏臣瑛等充總兵副總兵叅將得以總調官軍東西會合仰仗天威遠加已將猖獗之賊勦捕寧息照得湖廣邊境見有左叅將都督同知陳友奉勅總督守備又有都指揮僉事陳節分守平谿清浪鎮遠偏橋等衛署都指揮僉事汪迪分守辰沅靖州銅鼓等處及有布按二司專設叅政甄完副使呂困巡察邊務及貴州邊境見

有叅將都指揮張任奉勅總督守備又有按察司副使
張海職專撫鎮蠻夷其所屬興隆清平平越新添龍里
黃平六衛所則有署都指揮僉事趙信守備威清普定
安莊安南普安六衛則有署都指揮僉事張貴烏撒畢
節赤水永寧四衛則有署都指揮僉事安義其都勻一
衛偏入東南境接廣西至為孤僻則有都指揮僉事陳
原并布按二司各有叅政胡拱辰叅議盧斌尹弼李顯
僉事王貫譚琬張淑在於各路協同分守布置周密官

員數多使皆同心協力事無不濟但疆轍分於彼此緩急豈能齊同必設總兵官以統制之庶得柄歸於一便於調度如有警急自然同心協力互相應援軍勢益大而蠻夷畏威防制既嚴而醜類罔肆緣臣已將前項事情敷陳具奏該部擬候地方寧日另行奏請定奪近該查據貴州都布按三司守備分守等官左叅政胡拱辰等呈開各處殘破屯堡舖舍俱已逐旋修治其逃遁苗蠻始雖畏懼軍威箴匿巖穴近該陸續招撫出官向化

復業照舊認當糧差別無猖獗賊徒地方漸底寧靖然
臣切見四川雲南等處征進官軍連年在外衛所俱係
無軍替換不依原數仍調前來委的體無完衣用無完
器勞苦艱難隨到隨逃欲即差人沿途挨拏恐其別生
事端止是行文而已及見各處運糧人夫般運頻煩不
得休息往往棄糧拐貨中途走躲此等軍民既怕原衛
原籍拏捉不敢回還無非四散流離日久缺食難保無
虞及訪得貴州等衛所軍旗餘丁多有棄撇父母妻子

情愿在於苗寨住過不肯回還察其事情不過畏避差
操夫兵師之興在於除暴國家大計惟以安民今大軍
久駐邊境支用糧料停候捕捉而見在總兵叅將之中
有見地方漸寧即謂無事而縱欲敗度日加放肆者其
分守地方之官有專靠大軍駐劄而得以偷安避奸者
若不各嚴其責預為之計臣恐彼此不肯同心延至天
道炎熱嵐氣鬱蒸既而師老兵疲費耗糧餉逃者愈多
莫能禁遏加以人民不得安業重貽方來之患深為未

便欲候撫捕次第將四川雲南等處征進官軍與同總兵三司等官計議如數量留分撥緊要地方暫且守備餘令放回輪班更替使知有期各安乃心待後貴州衛所清勾軍士填補稍備屯堡完固前項輪班官軍亦可撤罷惟是前項鎮守統理之官合先定奪以從邊方之望以一軍民之心俾其任專責重將撫捕已定地方一面提督各該守備等官分投用心經畫整搦軍士器械修理城堡屯種互相防範守把嚴密比至班師之期始

終有備無虞查得右副總兵右都督方瑛自都指揮陞
克叅將由叅將而陞都督克副總兵一向在於雲南貴
州二處調度軍馬諳曉邊務究知夷情寡欲鎮靜實優
同列委的軍民畏服苗蠻警懼先該巡撫貴州大理寺
寺丞等官王恂等奏保本官陞克總兵鎮守貴州該部
具奏准令方瑛克總兵官候貴州賊情寧息仍行鎮守
貴州今湖廣貴州二處邊境一帶府衛州所相連叅錯
既有叅將都督都指揮等官各奉勅書總督守備及分

守地方撫鎮蠻夷巡察邊務官負足勾提督而總兵為
專制之官若令二人兼理見有總督尚且叅差不齊向
後豈能可否相濟合無該部計議於見在總兵副總兵
內從公選取一員令充總兵官鎮守湖廣貴州統制二
處地方軍馬往來督理守備庶幾身任其責知所干繫
實為事體利宜軍民便益臣仍將鎮遠清浪等處撫捕
官軍嚴督副總兵叅將都督毛福壽安順等統領前來
將貴州東苗并大小平伐乖西等處地方作急併力撫

捕另行奏請聽候定奪班師臣誠愚闇仰承恩命叨總
軍機夙夜惟思勉圖補報凡有纖悉幾微罔不盡心戮
力然事關利害豈容緘默致貽後患緣係地方軍務事
情及恐程途寫遠緩誤事機具題該本部官欽奉聖旨
兵部知道欽此欽遵抄出到部看得右都御史王來奏
稱蠻夷向化復業別無猖獗賊徒地方漸底寧靖要將
四川雲南等處征進官軍如數量留其餘放回輪替一
節參照前項官軍雖是調征年久委的疲勞推原所由

亦出於事不得已蓋以貴州湖廣兩處地方苗蠻相扇
為患積有年歲所在官軍數少調遣不敷以此動調雲
南四川官軍兼同領用即目湖廣武岡州及永州府江
華等縣并附近廣西地方貴州東苗大小平伐乖西等
處苗蠻節次出沒擾害地方未曾寧復節該巡撫等官
右都御史李實等具奏賊勢猖獗殺傷官軍又况苗賊
之性反復不常官軍到來則推稱聽招復業一見軍退
則依舊搶掠為非若非整肅兵威安能懾服鎮靜兼以

湖廣貴州兩都司官軍為因連年征進中間凋耗數多
若將雲南四川湖廣官軍量減放回雖為俯徇下人之
情實非防範奸宄之策萬一苗寇瞰我官軍掣動重復
聚眾逞奸斯時再為徵調未免欲逸反勞欲靜反動路
途往復愈加艱難倘或誤事咎將安歸王來所奏未必
無見但所見者一時之事臣等所慮者久遠之圖所據
前項調征官軍難便踈放其稱都督方瑛寡欲鎮靜軍
民畏服要於見在副總兵內充總兵官鎮守湖廣貴州

統制二處軍馬一節緣貴州湖廣地方土官衙門數多
壤地四散寯遠實為南方大藩每處總兵官一員尚且
提轄不周賊情反復若以一人總制兩處則事務多而
智慮有限地方遠而耳目不及其餘邊務之利害豈能
悉知賊情之緩急豈能盡見施之於平居無事之時或
宜減省用之於邊方多事之秋未見其可况方瑛當賊
平之日充總兵官鎮守貴州陳友克叅將總督守備湖
廣邊境俱係比先議奏已定不可紛更有乖軍務合令

方瑛仍暫充副總兵陳友依舊守備辰沅等處候事體十分寧靖另行定奪本部仍差人馳驛齎文與王來公同總兵官保定伯梁瑄并方瑛陳友等調度官軍將各起未靖苗寇務在設法撫安勦捕以除軍民之患以為久遠之利務俾根株斷絕勿使枝葉蔓延貽患日後不得杜絕仍令梁瑄必須始終一心先後一節毋謂賊寇稍安輒便縱慾敗度贖貨害軍棄廢前功自貽後悔而王來亦當往來提督撫綏鎮靜革弊防奸圖惟經久以

寧邊境若果賊寇十分寧息朝廷自有明降班師不必再三具奏其方瑛亦須益固廉節益殫忠勤勿謂名已著而易其初心勿以事小寧而怠其武備異時功勳茂著朝廷陞賞弗吝若貴州賊平照依先奏令充總兵官鎮守其雲南四川調來官軍亦候貴州地方事體十分寧息另行踈放緣奉欽依兵部知道事理具題景泰三年四月十二日奉聖旨是欽此

兵部為賊情事內府抄出鎮守廣東印綬監左監丞阮

能題據廣東都司呈奉左副總兵右都督董興劄付准
前軍都督府咨備兵部咨呈該臣等題廣東地方內則
海寇有腹心之患外則猺黎有邊境之虞乞將原調廣
西官軍俱留哨備等因抄出到部叅照廣東廣西地方
相為唇齒遇有賊情自當互相應援今議調策應廣西
官軍要行存留難以准理合無行令廣東左副總兵右
都督董興將廣西守備兩班官軍其未調之數委能幹
頭目務在日下統率起程不許延誤本部擬奏咨呈該

府行移到臣先查得廣東都司所屬除沿海衛所全伍守城備倭不動外腹裏衛所原額設官軍事故者多調用不敷已將缺軍緣由并地方賊情會題去後今該前因緣係動調官軍會同左副總兵右都督董興巡撫兵部左侍郎揭稽巡按監察御史周文郁都布按三司右布政使戴弁等會案行移廣東都司即行腹裏廣州左等衛所將操候上班哨守雷廉等處地方官軍內摘撥一千五百員名整搦軍裝器械戰船齊備推委廣州後

衛指揮同知邵清把總於景泰三年三月十八日起程
前去廣西兼領指揮席珍先領去官軍一千員名共二
千五百員名策應外再會議得廣東地方見據高肇等
府瀧陽信電等縣累被廣西北流岑容陸川博白等縣
賊首李受本等聚眾動輒千百為羣往往越境流劫鄉
村攻打化州城池石康縣治及瀧水徭賊趙音旺黎宗
安等不服招撫反將招主莫宗貴等五名殺死聚眾出
沒又據化州石城新興陽春等州縣八狀申備民人李

永忠等告被廣西流賊糾合猺賊一千餘名或三五百名景泰三年月日不等到來劫殺家財人命及劫去獨鶴驛鋪陳三十八件絡繹不絕委實缺軍調用固守城池伏望聖旨憐憫乞勅該部轉行廣西左副總兵都督武毅將前項調去官軍指揮邵清等不為常例暫行策應回軍之日發回廣東照舊哨守地方庶不缺軍調用有備無患實為便益具題又該左副總兵右都督董興亦題前事該本部官欽奉聖旨兵部知道欽此欽遵通

抄到部叅照前項官軍原係比先年間議奏調撥廣西
輪流操備邇者廣東賊發之時廣西曾動調官軍一萬
之上前來廣東策應今廣西賊勢猖獗而廣東副總兵
都督董興等既不調兵應援又要將輪流操備官軍二
千五百員名候回軍之日發回廣東顯是董興不恤鄰
邦之患惟徇一己之私聽從下人囑託詭計朦朧捏奏
不思廣西賊勢苦急未免延蔓本處又况廣西副總兵
等官武毅節奏賊寇十分緊急要調大軍協濟本部為

無相應官軍覆奏催督廣東官軍上緊起程赴廣西聽
調今董興議要發回虛張賊勢非惟怠忽軍務抑且逞
肆奸謀及照董興先在廣東其初持身蒞事頗有可稱
訪得近來改易節操穢行彰聞近該兵科右給事中黃
士儁陳奏風聞人言若董興仍在廣東二年必再有黃
蕭養者出貪黷誤事灼然可知若不行移督責誠恐本
官指以具奏為由故將廣西輪班官軍掣回搖惑人心
沮壞兵備賊寇益肆剽掠為兩處地方之患合無令該

府差人馳驛齎文與董興公同巡撫廣東左侍郎揭稽等督發輪該廣西操備官軍依期前去輪換常川聽調不許懷奸挾詐捏詞支吾以致軍士無奮勇之心地方被賊寇之患如違定行叅奏治以重罪該府仍行廣西副總兵武毅知會緣奉欽依兵部知道事理具題景泰三年四月十五日奉聖旨是欽此

兵部為防患事兵科抄出巡撫廣東兵部左侍郎等官揭稽等題該兵部奏准咨臣公同總兵鎮守內外官負

及巡按御史都布按三司堂上官從長計議何處賊寇十分盡絕何處賊寇尚未平安何處軍馬可以散回何處官軍宜暫守備何方可以絕後日之患何策可以為經久之計備將議過防患方畧逐一具由差人馳奏定奪臣等會同鎮守廣東左監丞阮能左副總兵右都督董興巡按監察御史周文郁都布按三司都指揮僉事于羽右布政使戴弁按察使馮傑等議得前項事情逐一開立前件會本具題該本部官欽奉聖旨兵部

知道欽此欽遵抄出到部今將所言事件議擬開列
前件謹題請旨景泰三年四月十六日奉聖旨是欽
此

計開

一何處賊寇十分盡絕軍馬可以散回前件議
得廣東先因南海縣叛賊黃蕭養等烏合醜類
乘虛攻犯城池上干宸聽命將出師方得克渠
授首餘黨殄滅即今雖已盡絕緣南海縣所管

一十一都該三百二圖內東涌馬寧西林三都
該一百八十圖俱臨邊海地方濶遠江海瀾漫
人民梗化平居無事之時其仰船罔等處亦有
強賊出沒及黃蕭養等聚衆則賊徒蜂起響應
以致延蔓臣等已嘗取勘彼處合立一縣并設
千戶所一處庶為經久另本具奏伏乞聖裁其
原調官軍俱已散回原衛所別無未散之數前
件查得揭稽等具奏要於南海縣設立所縣緣

由合無行移揭稽公同副總兵都督董興并都
布按三司堂上官及巡按監察御史徑自從長
計議若果南海縣合當設立一縣并千戶所一
處將備細緣由并調那是何去處官軍及是何
縣所名目明白開奏以憑定奪務在斟酌得宜
經久利便不許偏執已見及輕易更張以致有
損無益反為後患

一何處賊寇尚未平安官軍宜暫守備前件議

得廉雷高肇四府地方接連廣西彼此俱有猺
獠不入版圖不遵治化專尚劫殺洪武年間大
軍勦殺致數十年地方寧靖人民安業近年此
類蕃衆其賊首趙音旺等糾合廣西賊徒動以
千數開張旗號各執兇器大則包圍城堡燒毀
衙門小則流劫鄉村殺虜人財已嘗增築城池
設立營堡調撥官軍分投守備奈何猺山星散
恃其險阻叛服不常我軍稍失防閑輒敢大肆

侵掠數年之間良民被其劫殺數千餘家即今
多被殺散不敢復業田土拋荒稅糧無徵委的
民不聊生而徭賊虎狼之心貪暴不已必須動
調大軍會合兩廣總兵協謀運策剋期夾攻殲
除渠魁傾其巢穴庶使犴類消耗邊患可息緣
廣西蠻賊未寧未得會兵合行今秋會同右都
督董興量調官軍達官民壯開通道路直抵
賊巢仍委布按二司堂上官員閱視相機行事

可勦則勦可撫則撫果有真心向化衆所信服者欲照福建貴州撫捕蠻夷事例乞勅臣等就與搖首冠帶量授職事專撫搖人及於要害去處照依廣西事例添設巡檢司衙門僉點牌兵協同官軍哨守則撫捕兼行恩威並著庶幾地方可寧前項官軍宜暫守備前件看得廣東賊情既已未曾平妥總兵等官理合調軍作急設法相機撫捕若候今秋方纔區畫未免長奸

玩寇且賊寇之患甚於倒懸拯民之急甚於水火豈可移文推調不即撲捕祛除致使蔓延滋甚重貽邊患又况給授冠帶職事係是恩典出於朝廷非臣下所敢專制及貴州等處撫捕苗蠻總督總兵等官亦無徑自授人冠帶事例難准合行揭稽公同副總兵都督董興等調度官軍無分明夜將所在山徭賊寇躬親前去設法撫捕以除民患具實回奏不許推調遷延殃民

玩寇仍公同各官計議前項要害去處合設巡
檢司幾所將巡檢司名目并合僉弓兵若干備
細具由開奏若果搖首招撫有功臨期奏請定
奪

一何方可以絕後日之患何策可以為經久之
計前件議得廣東廣西地方相連風土不異廣
西既有總兵叅將以總兵政廣東亦宜照例存
留總兵添設叅將精選三司堂上并府州縣正

官善加撫恤軍民衣食既足則何以有後日之
患緣軍士缺少乞勅該部轉行清軍御史并布
按二司官督屬嚴限清解逃故等項軍丁補足
原伍專一守備本處地方不許別項差調庶為
經久之計前件看得廣東原無總兵叅將名目
近因賊寇生發欽命都督董興充副總兵領軍
殺賊難比廣西地方蠻夷數多原有總兵等官
一概濫設况處置民情軍務貴在得人得其人

則一人任之有餘非其人雖衆人任之不足今
廣東既有董興總兵又有揭稽巡撫若董興能
整飭武備振肅兵威而不致貪黷害軍揭稽能
修政立事撫恤軍民而不致因循誤事則屬官
自然守法下人自然得所境土自然寧謐盜賊
自然祛除難再添設叅將重為軍民之擾所言
難准其稱要行清軍御史并布按二司官嚴限
清解不許視常怠慢徒具虛文致誤兵備及稱

精選三司堂上并府州縣正官合行吏部徑自查
照定奪

兵部為求討等事准禮部咨禮科抄出巡撫四川都察
院左僉都御史李匡題准本院咨備兵部咨開棟巴罕
呼宣慰使司掌司事都指揮同知科爾壘嘉勒察節次奏
要於舊威州保縣出境已該鎮守四川內官陳涓等奏
有窒礙合無勅令鎮守松潘刑部左侍郎羅綺同僉都
御史李匡巡按御史三司等官將科爾壘嘉勒察所奏從

長計議除保縣威州不准開通外其餘舊日經行別無
違礙道路可以入貢者宜從相度停當要見作何處置
可以折其覬覦之心若何區畫可以消其反側之意使
蜀地安全蠻夷納款其實回奏或照內官陳涓所奏今
後遇有進到馬匹盔甲却之不受等因具題奉聖旨是
欽此欽遵備咨到部行間又准侍郎羅綺咨煩照欽奉
勅內事理前來威州會議准此訪得舊威州在保縣之
外八十里唐李德裕謂其據高山絕頂三面臨江在戎

虜平川之中是漢地入兵之路號為無憂城臣竊謂此地若漢人得而守之番人不敢東向若番人得而守之則漢人不可西行本州與普透當札木瓦寺斯賚日卜珠陸寨先係保縣管轄科爾壘嘉勒察伊父囊格自永樂八年歸附之後凡有進貢俱從日珠等寨經過於保縣出境宣德七年雜谷安撫司安撫日斯昂結將前項六寨占據阻截棟巴道路正統七年間草坡賊人作耗都司調軍征勦其棟巴乘時調領番兵迎合官軍勦賊就送

馬匹從草坡出境赴京進貢奏要開通古墩道路該四
川三司勘得古墩係雅州靈關其路險狹正統八年間
勅令棟巴仍從銅門山普透冒卜珠保縣出境被雜谷仍
前阻當正統十二年間鼎日斯結病故伊弟阿拜管事
將守把達實愛滿長官司多儒寨頭目松彭挫辱及有阿
拜異母兄多爾濟爾結伊姊嫁科爾壘嘉勒祭為妾忿恨
不承襲管事與弟觀吹達爾并松彭俱去投托棟巴正
統十三年間棟巴撥人守把多儒寨搶占達實愛滿長官

司地方正統十四年棟巴以追還貝珠等寨給還保縣
為名搶占雜谷安撫司地方就將雜谷原占保縣舊維
州亦行撥人守把景泰元年間棟巴要進馬匹盔甲從
保縣出境內官御史三司官不能必其順逆之勢備由
具奏欽蒙勅令棟巴將馬匹盔甲免進景泰二年三月
內棟巴差人進貢至保縣地方三司官親詣撫却其差
來之人執稱未奉之先馬匹已行出境續被雜谷達實
愛滿賚人將棟巴差來之人截殺連馬趕逐回還本年十

月二十四日棟巴差人二千餘衆護送馬一百餘匹赴保縣交割其餘番人盡行退還自後頗聽撫諭將原窩張阿賞杜阿泰王极的丁師保董伯浩等俱發回威州保縣復業訖今該前因臣與內官陳涓并三司掌印官親詣威州會同侍郎等官羅綺等計議得舊維州先係保縣管轄後為雜谷侵奪今為棟巴占據若得此州城量行撥人守把則可以杜棟巴覬覦之心不得此州城仍係番人居住未可以絕棟巴往來之路已經會案差

通事人等前去撫諭科爾壘嘉勒察著將舊維州退還保
縣未據回報間有疊溪千戶所該管永鎮等衛地方番
人聚衆上路殺虜官軍侍郎羅綺內官陳涓各往松潘
等處行事去訖臣竊以為欲杜棟巴覬覦之心必須得
此州城欲消棟巴反側之意必須厚加管待向使懷柔
之道不至雖得此州城亦為無用阻彼一路亦為徒勞
考之於古唐司徒中書令韋臯嘗與吐番大戰於維州
則是吐番非因雅州維州之險而不來也今阻其行維

州之路則保縣一方固美矣又令其從靈關而來則雅州一方何罪焉況且又有一路從草坡出汶川縣一路從僚擇壩出灌縣一路從清溪口出崇慶州是皆不可阻之路若或四路並出竟將何術制馭抑聞本番之放肆起於小節之不周臣自受任以來仰體聖心凡遇番使之至尤甚加意以今較昔漸覺聽撫兼且番使之來雖曰進貢實則圖其口腹利吾賜予以故韋臯治蜀開清溪道以通羣蠻入貢又選羣蠻子弟聚之成都教以

書數羈縻之既而軍府厭於廩給同平章事杜棕奏減其數羣蠻遂叛伏望聖恩因其使人之來嘉其向化之忠俟其回還令齎勅與科爾壘嘉勒察著將舊維州碉房退還保縣掌管臣在成都日少仍乞勅四川三司并鎮守等官凡遇棟巴使人之至必須撫之以恩待之以信與之以酒食施之以小惠馬匹既已阻却盔甲仍令進奉則在我懷柔之道得而番人反側之意定矣臣之愚見如此除候原差通事人等回日另行會議具奏外具

題該禮部官欽奉聖旨禮部看欽此欽遵抄出移咨到部看得棟巴罕呼宣慰使司掌司事都指揮同知科爾壘嘉勒察自恃部落強盛陰懷異圖非止一日其控御之術防閑之道誠不可不加之意今既僉都御史李匡與內官陳涓侍郎羅綺及都布按三司掌印官公同計議彼中地方險易事情緩急要行請勅科爾壘嘉勒察將舊維州碉房退還保縣掌管并請勅四川三司鎮守等官凡遇棟巴罕呼使人之至必須撫之以恩待之以信與

之以酒食施之以小惠阻却馬匹令進盜甲係于處置
夷情合當俯徇羣議合無通行請勅科爾壘嘉勒察并鎮
守四川松潘及三司內外官員依擬施行本部仍差人
馳驛齎文與李匡當知科爾壘嘉勒察之奸當念地方撫
巡之重其於一應夷情邊備務要博采衆長折以中道
剛柔兼濟寬猛適宜本之以廉明濟之以通變毋生事
而激變毋縱惡而長奸毋貪小利以墮賊計毋邀近功
而妨遠圖必須十分用心不許纖毫怠慢致貽後患緣

係處置夷情具題景泰三年五月初九日奉聖旨是欽此

兵部為強賊流劫鄉村殺死人命等事內府抄出鎮守廣東印綬監左監丞阮能題據肇慶衛府呈稱景泰三年四月初六日備陽江所縣申報本年三月二十七日該水軍都民唐馬保等狀告本年正二月日期不等有隣境新興縣得行等都松柏上期等甲那慶雙逕橫洞等處賊首曾大奴等各稱總管相公頭目統帶徒黨五

百餘徒各執鎗刀豎旗為號聲鑼播鼓流劫水東仕洞
二都民財三月二十五日又見賊首曾大奴等仍統千
餘徒到村包圍放砲連聲喊殺馬保得見賊衆潛身走
出當被殺死男唐璞唐三育男岑三奴戮傷男婦一十
二人放火燒屋掠去牛隻家財向往那處而去前賊見
在地名白馬寺山不時截路劫殺過往人員告乞轉達
調軍勦殺又據本縣申本年四月初二日該水東仕洞
二都排年里老岑瓊等亦告前賊流劫鄉村截路劫殺

人財人民驚阻不能耕種喬馬都里長鄭慶呈備民人李養等告稱本年三月十八日被強賊一羣約有一百餘徒到來包圍本村劫去耕牛家資放火燒毀房屋殺死民人黃八仔肖一妹各人走躲認是那處峒賊首譚戊辰等流劫聚齊回峒去訖及據新興所縣備雙看等都里老羅進呈節被高要新會等縣強賊入境明火劫虜牛財子女殺死人命告蒙新興守禦千戶所調委巡哨百戶蘇烈領軍出捕却乃畏縮不進本年三月初八

日期不等行劫獨鶴驛及燒劫那云村都龍表村殺死
民人梁遲等命虜去麥時習等家人畜各畏讐殺俱不
敢告只今正係農耕時月人民無牛田土失耕告乞添
撥官軍人等哨捕等因備申通行呈報到臣已經會議
於哨守陽春地方指揮徐昇官軍內調撥四百員名委
指揮李全管領督同新興新會陽江海朗四千戶所巡
哨官軍陽江等縣民壯并巡司官兵人等前去賊人出
沒處所勦捕及行府縣委官撫安地方民人去後今據

報到再會同左副總兵右都督董興巡撫兵部左侍郎
揭稽巡按監察御史周文郁都布按三司左布政使戴
弁等議得前賊猖獗合委都指揮使梁興前去陽春等
處地方總督操調官軍哨備替回先差指揮徐昇回還
差操於廣州左等衛添調精壯官軍指揮千百戶劉清
等一千員名并量調衛所官軍府縣巡司官兵人等及
先調官軍除已通委都布按三司都指揮僉事胡英等
統領左叅政黎璉僉事蔣敬陶視前去所報賊情地方

同心協謀設法將民人唐馬保等所告賊首曾大奴等
照名擒拏其脅從之人若聽招撫許令出官首告免罪
復業如是負固不服就便嚴督所統官軍人等直抵那
處等峒賊巢相機勦捕等因具題又該阮能題為軍務
事節該欽奉勅臣等公同鎮守巡撫內外官員將原調
廣西操備官軍未調一千五百員名作急起調差委的
當官員管領前往廣西聽武毅等調度殺賊仍行整飭
大軍候至今秋果無別警爾等即便親自統領前往廣

西先差人約會武毅等相機運謀腹背夾攻勦滅前賊
欽此欽遵會議未調官軍一千五百一十二員名於腹
裏廣東左等衛所操候上班廉雷等處地方哨備官軍
內照數掣調推委廣州後衛指揮同知邵清把總前去
廣西統領指揮席珍先領去官軍一千員名共二千五
百一十二員名聽都督武毅不為常例暫行調用策應
外再會同左副總兵右都督董興巡撫左侍郎揭稽巡
按監察御史周文郁都布按三司左布政戴弁等謹遵

勅旨計議整搦大軍查得腹裏見在堪調官軍數少已
選屯種官軍及高州隴水等處回還官軍六千六百六
十員名不敷之數再行沿海衛所借撥除潮州碣石海
南三衛所原係極邊屯種備倭官軍不動止調見在守
城官軍九百員名其雷廉神電南海廣海東莞新會香
山等衛係是依山沿海就近斟酌借調備倭屯守精壯
官軍共七千四百九十一員名操候今秋殺賊緣照廣
東高肇潮州等府德慶化州隴陽等縣各報山海賊情

臣等統兵欲往廣西慮恐賊盜乘虛竊發彼此顧藉不
及除行仰廣東都司差委指揮張通楊經尹通分投馳
往各該衛所照數點選整搦該用軍火器械船隻齊備
編成隊伍委官管領專一操候及將餘有官軍餘丁舍
人家人一體編成隊伍操練固守城池合用糧料行移
廣東布政司委堂上官一員整理預備應用外擬於今
秋直抵賊巢布按二司堂上官員公同閱視相機務在
殄滅以靖地方獲功官軍具奏陞賞敢有臨陣畏縮審

問明白並照軍法處治緣係整搦大軍勦捕寇賊事理
具題該本部官欽奉聖旨兵部知道欽此欽遵抄出到
部案照前事已經請勅去後今該前因叅照所奏係干
賊寇聚衆侵擾地方及係調兵會合勦殺隣境賊寇重
事及照廣東廣西相為唇齒其廣東比先賊發之時廣
西曾調官兵一萬之上前去協濟撫捕今廣東大勢賊
寇俱已平安止有前項搖撞倚山為勢不時出劫而副
總兵董興等俱各遷延歲月不即成功尤恐各官因見

奉有勅旨令其調兵會合廣西總兵等官殺賊故意虛張賊情意圖遮掩多難救恤隣邦及照名雖差人具奏其實逗遛不進肆意遷延致使賊寇蔓延未免彼此受害合無行令該府差人馳驛齎文與廣東副總兵都督董興公同侍郎揭稽等將肇慶府地方賊寇務在設法上緊嚴督所在守備頭目撫捕日下盡絕具實回奏仍選調精兵副總兵等官董興等躬親統率依期會合廣西官軍勦殺賊寇務要彼此協謀以圖成事不許爾我

顧望致誤機務有功之臣朝廷自有陞賞兵事方始違
令必不容貸況今秋期已近正係進兵時月不可虛應
故事有誤廣西救援該府仍行廣西總兵都督武毅整
搦官軍申明號令候廣東官軍到彼期約會合夾攻勦
殺賊寇必須計出萬全事無一失不許輕易苟且玩寇
殃民如違罪有所歸緣奉欽依兵部知道事理具題景
泰三年六月初六日奉聖旨是欽此

兵部為陳言禦寇救患等事內府抄出鎮守廣東印綬

監左監丞阮能題據廣東布政司呈據經歷司案呈抄
蒙欽差監察御史王允案驗節該欽奉勅廣西潯梧柳
慶等處盜賊連年生發流劫鄉村殺掠民財邊民受害
朕甚憫之近言者謂必得廣東調兵與廣西兵會合夾
攻庶幾可滅前賊然廣東累報茂名等縣賊寇出沒不
絕兩廣賊勢未審緩急若何遣將調兵難以遙制今特
命爾星馳往彼察勘廣東賊勢如果少緩即便會同彼
處鎮守巡撫內外官員著令都督董興量領大軍并彼

該調輪班官軍作急前去會合廣西都督僉事武毅等將應有賊寇逐一勦滅以靖地方其董興等不許似前推避縱賊殃民若廣東亦賊勢未寧董興難於調動或先調輪班官軍前去接應務在相度事勢從宜區畫停當而行欽此欽遵行據廣東都布按三司各呈開景泰三年四月內日期不等節據肇慶等府陽江等縣及福建流來海賊登岸共三十八處各申報自本年正月等月以來賊寇出沒劫掠人財不絕等因轉呈臣因見侍

郎揭稽前往潮州府公幹未回及見各處賊情緊急已
經會同御史王允會案轉行都布按三司并都督董興
量撥官軍星馳於緊要有賊去處暫且勦滅去後今侍
郎揭稽回還臣等就會同御史王允查得前項州縣委
有盜賊生發陸續劫殺人財情由若將董興調去廣西
會合都督武毅夾攻殺賊見今廣東所屬地方賊勢未
寧難便調動除行董興知會仍行本官候有飛報賊情
量調官軍勦賊及查得本處該調輪班官軍共二千五

百一十二員名差指揮席珍等已於景泰二年六月初二日并景泰三年三月十八日起程前往廣西接應殺賊去訖及行廣西都司轉行總兵等官知會外緣節該奉勅若廣東亦賊勢未寧董興難於調動或先調輪班官軍前去接應事理具題該本部官欽奉聖旨兵部知道欽此欽遵近該鎮守廣東左監丞阮能等題遵依勅旨計議整搦大軍擬於今秋同左副總兵董興等欲往廣西勦殺賊寇等因具題抄出到部已經奏准行移董

興等今秋務要選調精兵躬親統率依期會合廣西官軍將賊寇設法撫捕并行廣西副總兵都督武毅一體整搦官軍會合殺賊去後今抄前因看得前項題本二本相去不過二三日一則奏稱動調大軍前去廣西殺賊一則奏稱董興難以擅離止是先調輪班官軍前去似此前後展轉不一顯是董興不以邊務賊情為重故意串同捏奏及照廣東比先賊發之時武毅曾親率官軍一萬之上前來救援以此將廣東賊首黃蕭養等擒

斬地方無虞今廣西賊勢十分猖獗其望廣東救兵之
來如解倒懸之急而董興等不思地界毘連彼此安危
所繫若能救援廣西平安則兩處地方俱得寧息却乃
展轉推調豈不縱寇長奸及照廣東都司見有都指揮
梁興等俱係分布各屬守邊殺賊之數若執留董興在
於廣東不知梁興等所幹何事兼且廣東地方不過強
盜劫財比之廣西賊勢猖獗不同事有重輕合當斟酌
合無令該府差人馳驛齎文與董興公同侍郎揭稽內

官阮能等作急調度官軍今秋務要起程前去廣西會
合武毅等和同計議運謀設策將各起賊寇招撫勦捕
盡絕以除一方之患具實回奏施行不許逗遛顧望致
貽後日之患其廣東本處地方賊寇亦要上緊勦除以
安軍民不許因循怠忽兩相妨誤緣奉欽依兵部知道
事理具題景泰三年六月初八日奉聖旨是欽此

忠肅集卷三